

A Pas ane Pol tetek a tarai Rom

A warwara talapor nigo

Ning e Pol i kes tumo e Korin, i tumus a pas ne tetek a tarai a lotu tumo e Rom. I saran a pas tana ning a hane a risana e Pibi pa i abarani utumo e Rom (oroï Rom 16:1).

E Rom a tnan hanua kol, ning a tnan king, ning di atongi mang a Sisar i kes ia.

Ning e Pol i tumus a pas ne belot i han utumo e Rom pa belot i asaer la. Pa te na pas ne i mang sur ir asaer la ana galis a utna. Ning a tnan utna ning i mang sur lar talapor onoi i mange: A taraila rop la ka tol tar a laulauna pa bel tik i tostos na matana e God. Dalar tostos na matana e God ning dala tortorot oe Iesu Karisito. Pa ning dala tortorot oe Karisito, dalar laun ana tona lalaun pa dalar mur ma a Talngan Tabu. I warwara otleng ana tarai Juda, mang e God bel i duman la.

E Pol i atai la otleng mang i mang sur ir han tetek la.

A tinan ana buk Rom:

A kamkama buk ne (1:1-17)

A tarai rop la tol a laulauna pa la kapan sur a lalaun (1:18-3:20)

E God ir alaun dala anasa dala tortorot oe Karisito (3:21-4:25)

Oe Karisito dala laun ana tona lalaun (5:1-8:39)

E God bel i duman a tarai Israel (9:1-11:36)

A wakak a toltol ning dalar muri (12:1-15:13)

A ararop a warwara ane Pol tetek a tarai Rom (15:14–16:27)

E Pol i warwara talapor ana nuna titol na aposel

¹ Iau e Pol, a tena titol oros ane Iesu Karisito, a tumus a pas ne tetek mulo. E God i kabah pas iau, sur ar aposel, pa i aslang pas iau sur ar warawai ana nuna Wakak a Warwara tetek a taraila.

² A Wakak a Warwara ne, e God ka lele nigo tar onoi, ana warwara ning anuna propetla la ka tumus tari ting na Buk Tabu.

³ A Wakak a Warwara i atai dala oe Natnalik, ning di agon pasi miting na mangis a tarai ane king Dewit.

⁴ Pa ana nuna kamkamtur ulak kusun a minat, a Talngan Tabu i asangani mang ai a Nat e God pa i rakrakai kol. I ot e Iesu Karisito anundala a Leklek.

⁵ Oe Karisito ot, e God i maris mila pa i saran a titol na aposel tetek mila, sur milar aleklek pas a risana. Mila sira warawai tetek a tarai rop ning bel na tarai Juda, sur lar tortorot pa lar mur a warwara anunai.

⁶ Mulo otleng dingla na halinla, ning e God ka kabah pas mulo, sur mulo ane Iesu Karisito.

⁷ A tumus a pas ne tetek mulo rop ting e Rom, ning e God i maris mulo pa i kabah pas mulo sur mulo anuna taraila.

A marmaris pa balmolmol tetek mulo ta e God a Tamandala pa tana Leklek e Iesu Karisito.

E Pol i araring sur a tarai Rom

⁸ Ine a ningnigo na utna, ana risana e Iesu Karisito, a atong wakak tetek anuk a God omulo rop, anasa a tarai te na rakrakan hanua rop la warwara talapor ana numulo a tortorot.

⁹ A titol tetek e God ana nuk a lalaun rop, ning a warawai ana Wakak a Warwara oe Natnalik, pa e God ot i tasmani mang a sira nuk pas mulo

¹⁰ ana nuk na niaring ana taimla rop. A araring otleng mang, ning a nuknuk ot ane God, ngandek ono bot ne ir sapang anuk a ngas sur ar han tetek mulo.

¹¹ A mang kol sur ar oroi mulo, sur ar tabar mulo ana artabarla, ning ir nangan a ingumulo, sur ir arakrakai mulo.

¹² Manglarning, ning ar oroi anumulo a tortorot, pa mulo otleng mulor oroi anuk a tortorot, dalar wunan artalai dala.

¹³ Na tastasikla, a mang sur mulor tasmani mang, a galis a taim, a mang sur ar oroi mulo, sur ar nangan mulo par oroi a wana nuk a titol ting na numulo a lalaun, larning a oroi ting na lalaun ana maskana tarai, ning la otleng bel na tarai Juda. Ika, tuk onone, bel a tolsot sur ar han.

¹⁴ Anuk a titol ot ning e God i saran tari tak, sur ar warawai tetek a tarai ning la tasman a warwara Grik pa tarai otleng ning bel la tasmani, tetek na tena tastasim pa la ning anunla tastasman bel i itna.

¹⁵ Ine a kamkamna ning a mang kol sur ar warawai ana Wakak a Warwara tetek mulo otleng tumo e Rom.

A Wakak a Warwara i a rakrakai e God

¹⁶ Bel a meme ana Wakak a Warwara, anasa i a rakrakai e God sur ir alaun pas a taraila rop ning la tortorot. Tetek mila a tarai Juda nigo, pa onone tetek mulo otleng ning bel na tarai Juda.

¹⁷ Anasa a Wakak a Warwara i apuasa a ngas ning e God i toli, sur a tarai lar tostos na matana. A ngas ning, a tortorot ka. A tortorot ka miting na kamkamna tuk ana araropna. Larning di ka tumus tari ting na Buk Tabu mange, “Esining i tortorot, e God ir atongi mang a tena tostos pa ir laun.”

Habakuk 2:4

E God i balakut tetek a tarai ana nunla na toltol laulaula

¹⁸ E God i apuasa anuna balakut misaot na langit, tetek a tarai ning bel la hanrawai e God pa la tol a laulauna, pa ana nunla na toltol laulaula, la sairas a momolna.

¹⁹ E God i balakut, anasa a ututnala ning dir tasman e God onoi, i talapor ka tetek la, anasa i ot ka atalapor tari tetek la.

²⁰ Turpasi ana akakes te na rakrakan hanua, a tarai la oroi a ututna na akakes. I maining la tolsot pasi sur lar tasman na ginina e God, na ginina ning bel dir oroi. La tasmani mang a rakrakai e God ir kes tikin, pa i e God. I maining bel la tolsot sur lar atongi mang bel la tasman e God.

²¹ La tasman ot e God, ika bel la aleklek pasi larning i e God, pa bel la atong wakak otleng

1:16: 1:16 Mak 8:38; 1 Korin 1:18-24; Aposel 13:46 **1:17: 1:17**
 Rom 3:21-22 **1:19: 1:19** Aposel 14:15-17; 17:24-28 **1:20: 1:20**
 Jop 12:7-9; Buk Song 19:1 **1:21: 1:21** Epeses 4:17-18

teteki. La nuknuk oros ka, pa balanla i mormorom, anasa bel ta tastasman inla.

²² La atongi mang la tastasman kol, ika la hanot a longlongla ka.

²³ Bel la mang sur lar lotu tetek e God ning i laun tikin, pa i bukus ana matatar. La lotu ka tetek a manarla ana tarai ning la sira mat ka, pa tetek a manarla ana manila, pa inagoila, pa ututnala ning la kaukawar.

²⁴ I maining e God i noren tar la sur lar tol a dur a toltolla, larning la mang suri miting na balanla, pa lar tol a toltolla na meme artalai ana palaonla.

²⁵ La keles sen a momolna oe God sur a asasongo. La lotu pa la araring kama tetek a ututnala ning e God i akes tar la, pa bel ma la lotu tetek a Tena Akakes, i ning dir atong aleklek pasi onone pa lamur pa bel ir rarop. Amen.

²⁶ Ning la toli larning, e God i noren tar la ana nunla tnan nuknuk sur a laulau a toltolla na meme. I manglarne: A gurarala la keles sen a ngas a tinaulai ning di ka akes tari, pa la taulai ulak la ot.

²⁷ Mang otleng larning tetek a taraila, la han masik kusun a ngas a tinaulai ning di ka akes tari sur lar taulai a gurarala, pa la bukus ana tnan nuknuk sur la ulak ot, pa la tol a laulauna tetek la ulak. Bel al meme inla ning la toli larning. La ot la ka alaulau pas anunla na lalaun ana toltolla ne. La ka kibas tar a warkurai a

arkeles tetek la, ning i sot taum ana nunla na laulauna.

²⁸ Ning a utna otleng, bel ma la nuk pas e God, la nuki mang a asaer oe God i utna oros ka. I maining i noren tar la sur a nuknukinla ir laulau, pa la tol kama a ututnala ning bel i sot sur lar toli.

²⁹ La bukus ana toltol laulau, la tol a laulauna tetek a tarai, la mang sur na utna ning lar tena gongon onoi, la mang sur lar alaulau a tarai. La bukus ana toltol a ram, la umkol a tarai, la arngaras, la asasongo, la nget a tarai. La warwara kumkumna,

³⁰ la arle, la nget e God, la harum, la dat abarah a pukulunla, la iaunan pas la ot. La nuknuk sur a tona ngas sur lar tol a laulauna. La tabun longor tetek na tamtamanla pa na kabatnanla.

³¹ Bel la titol na tastasman, bel la tolsot pas anunla na lelela, bel la tasman a marmaris pa wakak a toltol tetek a taraila.

³² A ngas a tarai larne, la tasman ot a warkurai ane God, mang la ning la sira tol a ututnala ne lar mat. Pa i sot sur lar mat. Ika la toli ka, pa la malmaling sur a tarai masak otleng lar toli.

2

E God ir tol a tostos a warkurai

¹ I maining mulo rop ning mulo sira tiu a tarai masak pa mulo nuki mang mulo tostos, a atongi mang bel mulor puai sot pas. Anumulo na artituu ir tiu ulak mulo ot. Anasa mulo tiu a tarai

masik, ika mulo otleng mulo tol ka a toltol laulau arlar onla.

² Dala tasmani mang, ning e God i warkurai la ning la tol a toltol laulaula, anuna warkurai ning i tostos.

³ Pa mulo a tarai oros ka, mulo tiu la ning la tol a toltol laulau, ika mulo otleng, mulo sira toli ka. Mangasa, mulo nuki mang mulor liu kumna kusun a warkurai ane God? Ir warkurai mulo ot.

⁴ Ka asangan tar anuna wakak a toltol ning i itna tetek mulo, pa bel i warkurai kapit mulo ana numulo na toltol laulaula, pa bel i ngoro kapit omulo. Mangasa, mulo oroi purum anuna wakak a toltol? Mangasa, bel mulo tasmani mang i maris mulo larne sur mulor lingir a nuknukimulo?

⁵ Ika a balamulo i rakrakai pa bel mulo lingir a nuknukimulo, mulo ot mulo aitna amon anuna balakut tetek mulo, sur a pukakiar na balakut ane God, ning anuna tostos a warkurai ir hanot talapor.

⁶ E God ir warkurai a taraila taktakai arlar ot ana titol ning la ka tol tari.

⁷ La ning la rakrakai ana wakak a titol sur e God ir saran a matatar tanla pa ir aitna pas a risanla, pa la mang sur a lalaun ning bel ir rarop, e God ir saran a lalaun tikin tanla.

⁸ Ika tetek la ning la sira aitna pas la ot, pa bel la mur a momol a warwara ane God, pa la mur ka a toltol laulau, e God ir balakut tetek la pa ir balana kut tetek la.

2:4: 2:4 Epeses 1:7; 2 Pita 3:15 **2:6: 2:6** Buk Song 62:12; Gutpela Sindaun 24:12; Matiu 16:27; 2 Korin 5:10 **2:8: 2:8** 2 Tesalonika 1:8

⁹ Pa ir saran a mamahatla pa tnan kankan tetek la rop ning la tol a laulauna. Ir tol nigoni tetek a tarai Juda, pa lamur tetek a tarai masak otleng.

¹⁰ Ika, tetek la rop ning la tol a wakak a toltol, e God ir saran a matatar tanla, pa ir aitna pas a risanla, pa ir saran tar a balmolmol tetek la. Ir tol nigoni tetek a tarai Juda, pa lamur tetek a tarai masak otleng.

¹¹ Anasa e God bel i sira purpurngis.

¹² A taraila rop ning bel la tasman a Warkuraila ane Moses, pa la tol a laulauna, lar hirua ot. Pa mangotleng larning tetek la rop ning la tasman a Warkuraila ane Moses, pa la tol a laulauna, e God ir warkurai la otleng arlar ana warwara na Warkuraila.

¹³ Anasa bel la rop ning la longor a Warkuraila ane Moses la tostos na matana e God. La ka ning la mur a Warkuraila, e God ir atong la mang na tena tostos.

¹⁴ I momol, a tarai ning bel a tarai Juda, la ning bel la tasman a Warkuraila ane Moses, ika la tol ot a wakak a toltol larning a Warkuraila i atongi, i asangani mang a Warkuraila kaning ot na balanla.

¹⁵ A ngas a tarai ning, i talapor mang e God ka tumus tar a warwara na warkuraila ting na balanla. Ning la tol a laulauna, a nuknukinla ot i tiu la, pa ning la tol a wakakna, a nuknukinla i gas onoi.

¹⁶ Ana pukakiar ning e God ir warkurai a taraila, ir saran tar a warkurai uting na kuna e

Karisito Iesu sur ir warkurai la ana ututnala ning i kes kumna ting na balanla. Ning a sira warawai ana Wakak a Warwara, a sira warawai ana ututnala ne.

A te Judala la iaunan la ana Warkuraila

¹⁷ Ar warwara tetek mulo ning mulo atongi mang mulo na te Juda. Mulo nuki mang mulo tostos na matana e God anasa i saran tar a Warkuraila tetek mulo, pa mulo iaunan mulo mang, mulo ane God.

¹⁸ Mulo sira iaunan mulo mang, mulo tasman wakak a nuknuk e God, pa mulo gas ana wakak a toltol, anasa mulo ka asaer wakak pas a Warkuraila.

¹⁹ Mulo nuki mang mulo arlar ana halinla ning i nigon a kut, pa mulo arlar ana talapor tetek la ning la kes ana mormorom.

²⁰ Mulo nuki mang mulo asaer tostos la ning bel la tastasim, pa mulo na tena asaer tetek la ning bel la tasman ta utna, anasa mulo ka tong akes a tastasim rop pa momolna ting na Warkuraila.

²¹ Mulo asaer na tarai masik ana Warkuraila, ika mulo ot bel mulo asaer wakak pas mulo onoi! Mulo warawai tetek a taraila sur gong la kinkinau, ika mulo ot mulo kinkinau!

²² Mulo atongi tana tarai mang, “Gong mulo tol a laulauna ana ta hane anuna tik o ta barsan anuna tik,” ika mulo ot mulo toli! Mulo nget a asasongo na godla, ika mulo kinkinau ting na rumai artabarla anuna asasongo na godla.

²³ Mulo iaunan mulo ana Warkuraila ning e God i saran tari tamulo, ika mulo alaulau a risana e God, anasa mulo kutus a Warkuraila.

²⁴ Larning di ka tumus tari ting na Buk Tabu mange,

“A taraila ning bel na tarai Juda, la atong laulau a risana e God anasa omulo.” *Aisaia 52:5*

A Talngan Tabu i tol a momol a kot talilis

²⁵ Ning u mur a Warkuraila, a titol na kot talilis* ning di toli hom, i nangan u. Ika ning bel u mur a Warkuraila, u arlar ka ana tik ning bel di kot talilisi.

²⁶ Ning a tarai ning bel di kot talilis a palaonla, la mur a ututnala ning a Warkuraila ane God i warwara onoi, e God i oroi la larning di ka kot talilis tar la.

²⁷ Esining bel di kot talilisi pa bel di asaeri ana Warkuraila, ika i mur ot a ututnala ning a Warkuraila i warwara onoi, anuna lalaun ir tiu u, ning di ka kot talilis tar u, pa u tasman a Warkuraila, ika u kutusi.

²⁸ Tik ning a te Juda ka ana rising, bel a te Juda momol. Pa tik otleng ning di kot talilisi ka ana palaona, bel a kot talilis momol.

²⁹ Ika ning tik i mur e God ting na balana, i ning a te Juda momol. Pa momol a kot talilis, a Talngan Tabu i toli ting na balana, bel a tarai la toli ning la mur a Warkuraila ning di ka tumus tari. Tik ning a Talngan Tabu i toli larne onoi,

* **2:25: 2:25** A titol na kot talilis a akinalang ning di toli sur ir asangani mang, a barsan i miting na tarai ane God ning la mur a Warkuraila. **2:26: 2:26** Galesia 5:6 **2:29: 2:29** Lo 30:6; Kolosi 2:11

bel a taraila lar atong alekleki, e God ot ir atong aleklek pasi.

3

Anundala toltol laulau i asangani mang e God i tostos

¹ Ning tik a te Juda, anuna keskes na te Juda ir nangan mangmangasa i? Pa ning tik di ka kot talilis tari ir nangan mangmangasa i?

² I wakak kol teteki. A ningnigo na utna, e God ka suah tar anuna warwara ting na kuna tarai Juda.

³ I momol, dingla na tarai Juda bel la tortorot. Ning bel la tortorot, mangmangasa, i to pasi sur ir sairas e God sur gong i tolsot anuna warwara?

⁴ Bel momol! Ning a taraila rop lar asongo, a warwara ane God i momol ot. Larning a warwara tetek e God ning di ka tumus tari ting na Buk Tabu mang:

“Anum a warwara ir asangani mang u tostos. Pa ning dir tiu u,

bel tik ir pastetek pas ta rongo.” *Buk Song*

51:4

⁵ Ning dala tol a laulauna, anundala toltol laulau i asangan momoli mang e God i tostos. Mangasa, e God i rongo ning ir balakut pa ir saran a warkurai a arkeles tetek dala? A ngas a kabah ning, i hanot miting na nuknuk a tarai ka.

⁶ Ika bel. Ning anuna warkurai a arkeles bel i tostos, bel ir tolsot suir warkurai a tarai mite na rakrakan hanua.

⁷ Ngandek tik ir atongi mang, “Ning iau a tena asongo, anuk a toltol i asangan momoli mang

a warwara ane God i momol, pa i aitna pas a risana. I maining bel i tostos sur e God ir atong iau mang a tena laulau pa ar hirua ana nuna warkurai a arkeles.”

⁸ Ngandek tik ir atongi mang, “Dalar tol a laulauna sur a wakakna ir hanot talapor.” Dingla na tarai la atong laulau mila pa la tiu mila mang mila asaer a tarai lerne. Ika bel i momol. La ning la atong a warwara ne i sot sur lar hirua ana warkurai a arkeles ane God.

Bel tik i tostos na matana e God

⁹ Asaning dalar atongi ana utna ne? Mangasa, mila na tarai Juda mila ka tostos tana tarai masak? Bel i momol! Ia ka atong tari mang a te Judala pa tarai masak otleng la arlar ka. Dala rop dala kes nahai a toltol laulau.

¹⁰ Larning di ka tumus tari ting na Buk Tabu mang,

“Bel tik i tostos. Bel tik ot!

¹¹ Bel tik otleng ning i tastasim.

Bel tik i seren e God.

¹² La rop la ka han masak kusun e God.

La rop bel la to pas ma ta utna.

Bel ta halinla i tol a wakakna, bel tik ot.” *Buk Song 14:1-3*

¹³ “A pahanla i sapang arlar ana kulam a minat, pa warwara anunla i arlar ana goh a minat. La sira atong a asasongo ana pahanla.” *Buk Song 5:9*

“A warwara miting na pahanla, i arlar ana kusmapak a soi ning i sira harat amat tik.” *Buk Song 140:3*

14 “A pahanla i bukus ana warwara laulau pa i saran a mamahat tetek a tarai.” *Buk Song 10:7*

15 “La raras sur lar umkol a tarai.

16 Ting na ngasla ning la han ia, la kamar a ututnala, pa la alaulau a tarai.

17 Pa ngas sur a balmolmol, bel la tasmani.”

Aisaia 59:7-8

18 “Bel la matmataut sur e God.” *Buk Song 36:1*

19 Dala tasmani mang, asaning a Buk a Warkurai i warwara ono, bel i warwara ana tarai ning bel a tarai Juda ka, i warwara otleng ana tarai Juda, ning la kes nahai a Warkuraila. I maining a tarai rop mite na rakrakan hanua lar tur ana warkurai ane God, pa bel tik ir puai sot pas na matana e God.

20 I maining bel tik ir tostos sot pas na matana e God anasa i mur anuna Warkuraila. A Warkuraila i sira asangan dala ka ana nundala na toltol laulaula.

E God i atong a tarai mang la tostos ana tortorot ka

21 Ika onone, e God ka tol a ngas sur a tarai lar tostos na matana, ika bel ana mur warkurai. A ngas ne, a Buk a warkurai ane Moses pa propetla la ka warwara talapor tar onoi.

22 A ngas ne i hanot ta e God, pa i mange: A tarai rop ning la tortorot oe Iesu Karisito, e God ir atong la mang la tostos. A tarai Juda pa tarai masik otleng la arlar ka.

²³ Anasa a taraila rop la ka tol tar a toltol laulau, pa la ka kes bakbak kusun a matatar ane God.

²⁴ Ika ana marmaris ane God, e God i atong la mang la tostos. I toli larne arlar ana artabar oros ka, anasa e Karisito Iesu i lou langolango pas la.

²⁵ E God i saran tar e Natnalik, sur ir mat pa sulukna ir kepsen a toltol laulaula anuna taraila rop ning la tortorot onoi. Pa sulukna ir arop sen a balakut ane God ning nating kaning onla. I toli larne sur ir asangan anuna tostos a toltol. Nating e God i noren tar ka a toltol laulaula anuna tarai, pa bel i warkurai la onoi, anasa i wowon taum onla.

²⁶ Ika onone, i toli larne sur ir asangan anuna tostos a toltol, sur i ot i tostos pa esaning i atong a taraila mang la tostos ning la tortorot oe Iesu.

²⁷ Pa asa ma dalar iaunan pas dala onoi? Bel ta utna! Mangasa, dalar iaunan pas dala anasa dala mur a Warkuraila? Bel momol! Ana tortorot ka oe Iesu, dala tostos na matana e God.

²⁸ Anasa onone, dala tasmani mang e God i atong a taraila mang la tostos na matana, ana tortorot ka oe Iesu, pa bel ana mur warkurai.

²⁹ Mangasa, e God a God anuna tarai Juda ka, o a God anuna tarai masak otleng? Momol, ai a God anuna tarai masak otleng.

³⁰ Anasa takai ka a God, pa ir atong na tarai Juda mang la tostos na matana ana tortorot. Mangotleng larning tetek a tarai masak, ir atong la mang la tostos ana tortorot otleng.

³¹ Mangasa, ning dala tortorot dala nuki mang a Warkuraila i utna oros ka? Bel momol! Ana tortorot dala asangani mang a Warkuraila a rakrakainla ot.

4

E Abaram i tortorot

¹ Pa asaning dalar atongi oe Abaram, tamamilana tarai Juda? Asaning i asaer pas onoi ana ngas ning tik ir tostos na matana e God?

² Ning e God i atong e Abaram mang i tostos anasa ana wakak a titol ning i toli, i to pasi sur e Abaram ir iaunan pasi ot onoi. Ika bel i tolsot pas sur ir iaunan pasi na matana e God.

³ A Buk Tabu i atongi mang, “E Abaram i tortorot oe God, pa e God i atongi mang i tostos.”
Stat 15:6

⁴ Pa ning tik i titol, dir lowi ana nuna titol, bel a artabar. Anuna arlou ot ning i kibasi.

⁵ Ir mangmangasa tetek a barsan ning bel i titol, ika i tortorot oe God, esaning i sira atong a tena laulaula mang la tostos? E God ir oroi lalan anuna tortorot pa ir atongi mang i tostos.

⁶ E Dewit otleng i atongi larne, ning i atongi mang a barsan i angis ning e God i atongi mang i tostos, ana nuna tortorot ka, pa bel ana ututnala ning i toli. I atongi mange,

⁷ “La ning e God ka kepsen tar anunla na toltol na kutus warkurai la angis,
pa la ning e God ka nuk duman sen anunla na toltol laulaula, la angis.

⁸ A barsan i angis ning a Leklek bel i nuk pas
 anuna toltol laulaula,
 pa bel ir warkurai i ono.” *Buk Song 32:1-2*

⁹ Mangasa, a tarai ka ning di kot talilis a
 palaonla, la angis? Bel momol. A tarai otleng
 ning bel di kot talilis a palaonla, la angis. Anasa
 dala tasmani mang, ning e Abaram i tortorot, e
 God i atongi mang i tostos.

¹⁰ Nangse ning e God i atong e Abaram mang i
 tostos? Lanigo tana titol na kot talilis, o lamur?
 Lanigo tana titol na kot talilis, bel lamur.

¹¹ Ning belot di kot talilis e Abaram, e God i
 atongi mang i tostos na matana, anasa ana nuna
 tortorot ot. Ning e Abaram i kibas pas a
 akinalang na kot talilis, i asangani mang ka
 tostos na matana e God. I maining e Abaram a
 taman a tarai rop ning bel di kot talilis a
 palaonla. La tortorot pa e God i atong la mang la
 tostos na matana.

¹² Pa ai a tamanla otleng ning di kot talilis a
 palaonla. Bel i kamna anasa di kot talilis a
 palaonla, i kamna anasa la mur a ngas a tortorot
 ning a tamandala e Abaram i muri, ning belot di
 kot talilisi.

¹³ E God i lele tar e Abaram mang ir saran tar a
 rakrakan hanua tana pa tetek na tumtubunala
 otleng. A lele ne e God i tol tari tetek e Abaram
 bel i kamna anasa i mur a Warkuraila. I kamna
 anasa i tortorot, pa e God i atongi mang i tostos
 na matana.

¹⁴ Ning e God ir saran a rakrakan hanua tana
 tarai anasa la mur a Warkuraila, a tortorot a

utna oros ka, pa lele ane God bel i to pas ta utna.

¹⁵ Anasa a balakut ane God i kes onla ning la mang sur lar mur a Warkuraila, ika bel la mur sot pasi. Ning bel al Warkurai, bel dir kutus a warkuraila.

¹⁶ I maining, a ututnala ning e God ka lele tari, ir sarani tetek la ning la tortorot. E God i toli larning sur ir arlar ana artabar a marmaris, pa ir han tetek a mangis a tarai rop ane Abaram. Bel tetek na tarai Juda ka, ning di saran tar a Warkuraila tanla. Tetek la otleng ning la tortorot lar e Abaram, a tamandala rop.

¹⁷ Larning di ka tumus tari ting na Buk Tabu mange,

“A akes tar u sur u a taman a tarai miting na galis a matanitu.” *Stat 17:5*

Ana matana e God, e Abaram a tamandala, anasa i tortorot oe God, esaning i sira akamtur a tarai kusun a minat, pa i sira warwara ka, pa ututnala ning belot la hanot, la hanot ka.

¹⁸ E God i lele tar e Abaram mang ir aitna pas ta natnalik. E Abaram i oroi larne a lele anun e God teteki bel ir hanot, ika i harnanai ot ana tortorot suri. I maining e Abaram i hanot a taman a tarai miting na galis a matanitu. Larning a lele ane God teteki mang, “Na tumtubum lar galis.”

¹⁹ Nating anuna tortorot bel i punga ning i oroi mang ka takai a mar a rau anunai, pa bel i to pasi sur ir agomo. Pa e Sara otleng ka wan pa bel ma i to pasi sur ir agon.

²⁰ Ika e Abaram bel i urmatana nuknuk tar ana lele ane God. I tur rakrakai pa e God i arakrakai anuna tortorot pa i atong aleklek pas e God.

²¹ Pa ana nuna tortorot i tasmani ot mang e God ir tolsot pas a utna ning ka lele tar onoi.

²² I maining “E God i atongi mang i tostos.”

²³ Ning i atongi mang, “E God i atongi mang i tostos,” bel i atongi ka oe Abaram.

²⁴ I atongi otleng ondala. Ning dala tortorot oe God, ning i akamtur ulak pas e Iesu anundala Leklek kusun a minat, ir atong dala otleng mang dala na tena tostos.

²⁵ E God i saran tar e Iesu sur ir mat ana nundala na toltol laulaula, pa i akamtur pasi kusun a minat, sur dalar tostos na matana.

5

Dala kes na balmolmol taum oe God

¹ Ana nundala tortorot ot, e God ka atong dala mang dala tostos na matana. I maining dala kes na balmolmol taum oe God, anasa ana nundala Leklek e Iesu Karisito.

² Ana nundala tortorot, e Karisito i nigon dala pa i akas dala ana marmaris ane God. Pa onone, dala ka laun onoi. Pa dala gas, ning dala harnanai ana tortorot sur a matatar ane God, ning dalar kes onoi lamur.

³ Bel i ka i ning, dala gas otleng ana mamahatla ning dala kilangi, anasa dala tasmani mang a mamahatla i tol otnan anundala tuntunur rakrakai.

⁴ Pa anundala tuntunur rakrakai i tol otnan a ngas a lalaun ning a larlarla bel lar apungan pas dala. Pa ngas a lalaun ne, i tol otnan anundala keskes na harnanai ana tortorot sur asaning e God ir toli lamur.

⁵ Ning dala harnanai ana tortorot, dala tasmani mang asaning e God ka lele tar onoi ir hanot ot. Anasa e God ka saran tar a Talngan Tabu tandala. Pa Talngan Tabu ka pek tar a marmaris ane God te na balandala.

⁶ Lanigo bel dala lotu tetek e God, pa bel dala tolsot pas ta utna. Ika ning a pukakiar i sot, e Karisito i mat sur dala.

⁷ I ngangaten kol ning tik ir mat keles ta tostos a barsan. Ngandek tik ir tolsot pasi sur ir mat sur ta wakak a barsan.

⁸ Ika e God i asangan anuna marmaris tetek dala larne: Ning dala laun ot ana toltol laulau, e Karisito i mat sur dala.

⁹ Pa ana sulukna e Iesu, e God i atong dala mang dala tostos na matana. Manglarning dala tasman momoli mang e Iesu ir alaun pas dala kusun a balakut ane God ana pukakiar a warkurai.

¹⁰ Ning dala na hirua ane God, i dat dala sur dalar armoro ulak taum onoi, anasa ana minat e Natnalik. Pa onone, ning dala ka armoro taum oe God, dala tasman momoli mang ir alaun pas dala otleng, anasa ana lalaun ane Natnalik.

¹¹ Bel i ka i ning, dala gas otleng oe God, anasa ana nundala Leklek e Iesu Karisito, ning ka amoro taum tar dala oe God.

E Adam i saran a minat, pa e Iesu i saran a lalaun

¹² Takai ka a barsan, i tol a toltol laulau, pa ana toltol laulau ning, a toltol laulau i hanot te na rakrakan hanua. A toltol laulau i tol otnan tar a minat. Pa ana ngas ka ning, a minat i han tetek a tarai rop, anasa la rop la tol a toltol laulau.

¹³ Anasa lanigo, ning e God belot i saran a Warkuraila, a toltol laulau ka kes te na rakrakan hanua. Ning bel ta warkurai, e God bel ir tiu tik ana toltol laulau.

¹⁴ Ika turpasi oe Adam tuk ana raula ning e Moses i laun, a tarai rop la kes nahai a rakrakai ana minat. Dingla na tarai bel la tol a ngas a toltol laulau arlar oe Adam, ning i kutus a warkurai. Ika a minat i umkol la otleng.

E Adam i arlar ana manar a barsan ning ir hanot lamur.

¹⁵ Ika a artabar ane God bel i arlar ana toltol na kutus warkurai ane Adam. Anasa galis a tarai la mat ana toltol na kutus warkurai anuna takai ka a barsan. Ika a marmaris ane God i itna kol pa i pulpulas, pa ana takai ka a barsan, e Iesu Karisito, pa ana nuna marmaris, i saran oros tar ka a artabar tetek a galis a tarai.

¹⁶ Ning a utna otleng, a artabar ane God bel i arlar ana utna ning i hanot miting na toltol laulau ane Adam. Anuna toltol ot ning i dat tar a tarai, sur lar hirua ana warkurai a arkeles ane God. Ika a artabar ane God i mange, ning a tarai la kutus warkurai a galis a taim, e God i maris kol la, pa i atong la mang na tena tostos.

¹⁷ Pa ana toltol na kutus warkurai anuna takai ka a barsan, a tarai rop la kes nahai a rakrakai ana minat. Ika, i momol kol, la ning la kibas pas a tnan marmaris ane God ning i bukus, pa la kibas pas anuna artabar ning i atong la mang na tena tostos, lar laun tikin pa lar hanot a tena warkuraila arlar ana kingla, anasa ana takai ka a barsan, e Iesu Karisito.

¹⁸ I maining ana takai ka a toltol na kutus warkurai ane Adam a tarai rop la ka kes ana warkurai a arkeles ane God. Larotleng ning ana takai ka a tostos a toltol ning e Iesu i toli, e God ir atong a taraila rop mang la tostos na matana, pa lar laun.

¹⁹ Pa ana tabun longor anuna takai ka a barsan, e Adam, a galis a tarai la na tena laulau. Larotleng ning, a galis a tarai la na tena tostos, anasa takai ka a barsan, e Iesu Karisito i mur a warwara ane God.

²⁰ E God i saran tar a Warkuraila, sur ir talapor mang a toltol na kutus warkurai anuna tarai i itna amon. A toltol laulau i itna amon, ika a marmaris ane God i itna bolosi.

²¹ A tarai rop la kes nahai a rakrakai ana toltol laulau, pa i saran a minat tetek la. Ika onone, la ning la kes nahai a rakrakai ana marmaris ane God, e God i atong la mang la tostos na matana, pa i saran a lalaun tikin tetek la, anasa ana tostos a titol ning e Iesu Karisito anundala Leklek i tol tari.

6

Ning dalar mat taum oe Karisito, dalar laun taum otleng onoi

¹ I maining, asa dalar atongi? Mangasa, i wakak ka sur dalar tol a toltol laulau sur a marmaris ane God ir itna amon?

² Bel momol! Dala mat kusun anundala toltol laulau. Dalar laun mangmangasa ulak ma onoi?

³ Mangasa, bel mulo tasmani mang, dala rop ning di baptais dala oe Karisito Iesu, dala mat taum onoi ana baptais ning?

⁴ Manglarning, ning di baptais dala, dala mat taum onoi, pa di ka por taum dala otleng onoi. E God a Tamandala i akamtur pas e Karisito kusun a minat ana tnan matatarna, larotleng ning dalar laun ana tona lalaun.

⁵ Anasa ning dala mat taum oe Iesu ana nuna minat, i momol ot, dalar tur taum ulak otleng onoi ana nuna kamkamtur ulak kusun a minat.

⁶ Dala tasmani mang anundala turai a lalaun ka mat taum oe Karisito saot na rakai kutus, sur a toltol laulau ana palaondala bel ta rakrakaina. Pa bel ulak ma dala na tena titol oros ana toltol laulau.

⁷ Anasa ning tik i mat taum oe Karisito, ka langolango kusun a rakrakai ana toltol laulau.

⁸ Ning dala mat taum oe Karisito, dala tortorot mang dalar laun taum otleng onoi.

⁹ Anasa dala ka tasmani mang, ning e God i akamtur ulak e Karisito kusun a minat, bel ir mat ulak, anasa a minat bel ta rakrakaina ulak ma sur ir tolsot pasi.

¹⁰ I mat muntakai ka, pa i mat sur ir kepsen rop a rakrakai ana toltol laulau. Pa ning i laun ulak, i laun sur e God.

¹¹ Mangotleng larning tetek mulo, mulor tasmani mang mulo ka mat kusun anumulo na toltol laulaula, pa oe Karisito Iesu, mulo laun sur e God.

¹² I maining, gong ulak ma mulo noren a palaomulo, ning i sira mat ka, sur ir kes nahai a rakrakai ana toltol laulau, sur gong mulo longor tana laulau a nuknuk ana palaomulo.

¹³ Gong ulak ma mulo saran tar ta diah palaomulo sur ir arlar ana utna na titol sur a toltol laulau. Mulo ka laun ulak kusun a minat, i maining, mulor saran tar mulo tetek e God. Pa mulor saran tar otleng a didiah palaomulo rop tetek e God, sur lar arlar ana ututnala na titol sur a tostos a titol.

¹⁴ Bel mulor kes nahai a rakrakai ana toltol laulau, anasa bel mulo kes nahai a Warkuraila. Onone mulo ka kes nahai a marmaris ane God.

Dala na tena titol oros ana tostos a toltol

¹⁵ Bel dala kes nahai a Warkuraila, dala kes nahai a marmaris ane God. Mangasa, dalar tol ulak a laulauna? Bel momol!

¹⁶ Mulo tasmani mang, ning mulo saran tar mulo tetek tik sur mulor longor tana, mulo na tena titol oros anunai. Ning mulo na tena titol oros ana toltol laulau, ir saran a minat tetek mulo. Ika ning mulo na tena titol oros ana toltol

na longor ana warwara ane God, mulor tostos na matana.

¹⁷ A atong wakak tetek e God, anasa lanigo mulo na tena titol oros ana toltol laulau, ika onone mulo longor ana balamulo rop ana asaerla ning di saran tari tamulo.

¹⁸ E God ka alangolango pas mulo kusun a toltol laulau, pa onone mulo na tena titol oros ma ana tostos a toltol.

¹⁹ A warwara ana warwara larlar ne tetek mulo, anasa bel mulo talapor wakak ana utna na ingun. Lanigo mulo saran tar a didiah palaomulo sur lar tena titol oros ana dur a toltol, pa anumulo na toltol laulau i gomo pa i itna. Ika onone, mulor saran tar a didiah palaomulo sur lar tena titol oros ana tostos a toltol, sur anumulo a lalaun ir totoh na matana e God.

²⁰ Lanigo, ning mulo na tena titol oros ana toltol laulau, bel mulo kes nahai a rakrakai ana tostos a toltol.

²¹ Mulo tol na toltol laulau, pa onone mulo meme onoi. Ning mulo toli, asaning mulo kibas pasi onoi? A minat ka.

²² Ika onone e God ka alangolango pas mulo kusun a toltol laulau, pa mulo na tena titol oros tetek e God. Pa mulor kibas a totoh a lalaun, ning ir suah otnan a lalaun tikin.

²³ Anasa a arlou ana toltol laulau a minat. Ika a artabar ane God a lalaun tikin oe Karisito Iesu anundala Leklek.

7

A warwara larlar ana warkurai a tinaulai

¹ A tastasikla, ar warwara tetek mulo ning mulo tasman ot a Warkuraila. Mulo tasmani mang la ka ning la laun ot la kes nahai a Warkuraila.

² Manglarning ar warwara larlar ana warkurai a tinaulai: Ning ta hane i taulai, a warkurai a tinaulai i dot taum diau mana nuna barsan, ning a barsan kaning ot i laun. Ika ning anuna barsan ka mat, a hane ning i langolango kusun a warkurai a tinaulai.

³ I maining, ning a hane ir taulai ulak ta barsan, pa anuna barsan kaning ot i laun, a hane ning i tol a laulauna. Ika ning anuna barsan ka mat, a hane ning i langolango kusun a warkurai a tinaulai, pa ning ir taulai ulak ta barsan bel i tol a laulauna.

⁴ Larotleng tetek mulo na tastasikla, ning e Karisito i mat, mulo otleng mulo mat taum onoi. I maining mulo otleng, mulo langolango kusun a Warkuraila, sur mulor kes kale tetek tik masak, tetek e Karisito, ning e God i akamtur ulaki kusun a minat. Pa onone, dala ka langolango, sur dalar suah a waindala sur e God.

⁵ Lanigo, ning anundala a lalaun i kes nahai a rakrakai ana turai a lalaun, a Warkuraila i akamtur otnan a laulau a nuknuk sur dalar tol a toltol laulau. Pa toltol laulau ana nundala a lalaun i wai, pa wana a minat ka.

⁶ Ika onone, dala mat kusun a Warkuraila ning nating i dot akes dala. Pa dala ka langolango kusun a rakrakai ana Warkuraila, pa dala titol tetek e God ana tona ngas, ning a Talngan Tabu i saran tari tandala. Bel i arlar ana ningnigo na

ngas, ning dala mur ka a Warkuraila ning di tumus tari.

A toltol laulau i umkol dala

⁷ Pa asa dalar atongi? Mangasa, a Warkuraila a toltol laulau? Bel momol! Ning bel ta Warkurai, bel ar tasman lalan a toltol laulau. Larne, ning e God bel ir atong tari ana Warkuraila mang, “Gong u ram sur a utna anuna tik,” iau otleng bel ar oroi lalani mang a ram sur a utna anuna tik, i a toltol laulau.

⁸ Ika a toltol laulau i pastetek pas a ngas ana warkurai ning, sur ir suah otnan tar a urmatana ngas a nuknuk te na balak sur a ututnala anuna tik. Anasa ning bel ta warkurai, a toltol laulau bel ta rakrakaina.

⁹ Ning belot a tasman a Warkuraila ane God, a laun. Ika ning ia ka tasman a Warkuraila, a toltol laulau i laun ot ting na balak, pa a mat.

¹⁰ A Warkuraila ning e God i saran tari sur ir saran a lalaun tak, i saran ka a minat tak.

¹¹ A toltol laulau i pastetek pas a ngas ana Warkuraila sur ir asongo tar iau, pa ana rakrakai ana Warkuraila, a toltol laulau i umkol iau.

¹² I maining dala tasmani mang a warkurai i totoh, pa na puka warwara na warkuraila rop la totoh, la tostos, pa la wakak.

¹³ Mangasa, a utna ning i wakak i umkol iau? Bel momol! A toltol laulau i umkol iau. A toltol laulau i titol taum ana wakak a warwara na warkurai, pa i saran a minat tak, sur ir talapor mang a ngas a toltol ne i laulau. Ting na

Warkuraila dala oroi lalani mang a toltol laulau i laulau kol.

A wakakna ning a mang sur ar toli, bel a toli

¹⁴ Dala tasmani mang a Warkuraila ane God a ututnala na ingun. Ika iau a barsan ka mite lapiu, pa toltol laulau i dot tar iau sur ar tena titol oros anunai.

¹⁵ Bel a talapor ana utna ning a toli. Anasa a utna ning a mang sur ar toli, bel a toli, ika a utna ning a ngeti, a toli.

¹⁶ Ning a tol a utna ning bel a mang sur ar toli, a malmaling mang a Warkuraila ane God i wakak.

¹⁷ I maining bel ma iau ot a tol a laulau a utna ne. A toltol laulau ot ning i laun te hok i toli.

¹⁸ A tasmani mang bel ta wakak a utna i laun te hok, ana turai a lalaun. Anasa a mang ot sur ar tol a wakakna, ika bel a tolsot sur ar toli.

¹⁹ Anasa a utna ning a toli, bel a wakakna ning a mang sur ar toli. Ika a laulauna ning bel a mang sur ar toli, a sira toli.

²⁰ Ning a tol a utna ning bel a mang sur ar toli, bel ma iau a toli, a toltol laulau ot ning i laun te hok i toli.

²¹ A oroi a ngas a rakrakai ne i titol te na lalaun anuki: Ning a mang sur ar tol a wakakna, a laulauna kanet hok.

²² Ana nuknukik a mang kol sur a Warkuraila ane God.

²³ Ika, ana palaok a oroi otleng ning a ngas a rakrakai, ning bel i mur a warkurai ane God. I

harum taum ana wakak a warkurai te na nuknukik, pa i dot akes iau sur a didiah palaok i kes na karabus ana toltol laulau.

²⁴ Iau a pot na marmaris a barsan! Esi ir alangolango iau kusun a palaok ne, ning ir mat?

²⁵ E God ot. A atong wakak teteki anasa i sune e Iesu Karisito anundala Leklek, sur ir alangolango pas iau.

I maining, iau ot ana nuknukik iau a tena titol oros ana Warkuraila ane God, ika ana turai a lalaun iau a tena titol oros ana rakrakai ana toltol laulau.

8

Gong dala mur a turai a lalaun

¹ I maining la ning la laun oe Karisito Iesu, bel ma ta warkurai a arkeles ane God tetek la.

² Anasa, ning kaning iau oe Karisito Iesu, a rakrakai ana Talngan Tabu, ning i sira saran a lalaun, i alangolango pas iau kusun a rakrakai ana toltol laulau ning i saran a minat tak.

³ A Warkuraila ane Moses bel i tolsot sur ir sairas a laulauna, anasa bel ta rakrakaindala sur dalar mur a Warkuraila, ning dala laun ana turai a lalaun.

Ika e God i tolsot pasi. I sune tar e Natnalik ute lapiu pa i hanot a mainla arlar ondala, a tarai ning la sira tol na toltol laulau. Ka mat pa ka alaun pas dala kusun anundala na toltol laulau. A warkurai a arkeles ana toltol laulau anundala, e God i suah tari ana palaona e Iesu, pa i arop a rakrakai ana toltol laulau.

⁴ I toli sur a tostos a toltol ning a Warkuraila la

warwara onoi ir hanot momol te na nundala lalaun. Bel ma dala mur a turai a lalaun, dala mur a nuknuk ana Talngan Tabu.

⁵ La ning la mur a turai a lalaun, a nuknukinla otleng i kes ka ana utna ning a turai a lalaun i mang suri. Ika, la ning la mur a nuknuk ana Talngan Tabu, a nuknukinla i kes ana utna ning a Talngan Tabu i mang suri.

⁶ Esining a nuknukna i mur ka a turai a lalaun ir mat. Ika, esining a nuknukna i kes nahai a Talngan Tabu, ir laun pa ir kilang a balmolmol.

⁷ Esining a nuknukna i mur a turai a lalaun, ai a hirua ane God. Anasa esining a nuknukna i manglarning, bel i anatarna pasi nahai a Warkuraila ane God, pa bel i tolsot pasi.

⁸ Pa la ning la kes nahai a turai a lalaun, bel la tolsot sur lar agasgas e God.

⁹ Ika mulo, bel mulo kes nahai a turai a lalaun. Ning a Inguna e God i laun ting omulo, mulo kes nahai a Talngan Tabu. Ika, ning tik, a Inguna e Karisito bel i laun ono, i bel ane Karisito.

¹⁰ Ning e Karisito i laun ting omulo, a palaomulo ir mat, anasa ana toltol laulau, ika a ingumulo ir laun, anasa mulo tostos na matana.

¹¹ A Inguna e God, ning i akamtur pas e Iesu kusun a minat, i laun ting omulo. Pa esaning i akamtur ulak pas e Karisito kusun a minat, ir saran a lalaun ting na palaomulo ning i sira mat. Ir sarani ana titol ana Inguna ning i laun ting omulo.

Dala na natnat e God

¹² I maining na tastasik, dala na tena titol. Ika bel dala na tena titol ana turai a lalaun, sur dalar muri.

¹³ Anasa ning mulo mur a turai a lalaun, mulor mat. Ika mulor laun, ning mulo umkol a toltol laulau ting na palaomulo ana rakrakai ana Talngan Tabu.

¹⁴ Anasa la ning a Inguna e God i nigon la, la na natnat e God.

¹⁵ Anasa a Talngan Tabu ning mulo kibasi, bel ulak ma sur mulo na tena titol oros ana matmataut. A Talngan Tabu ning mulo kibasi sur mulo na natnat e God, ning i ras pas mulo. Pa ana rakrakai ane God dala sira atongi mang, “Aba*, Tata.”

¹⁶ Pa Talngan Tabu i warwara talapor te na ingundala mang dala na natnat e God.

¹⁷ Pa ning dala na natnatnala, dalar kibas a ututnala ning e God ka lele tar ono. Dalar kibasi taum oe Karisito. Ning dala kilang a mamahat taum oe Karisito, lamur dalar kes taum onoi ting na nuna matatar.

Lamur dalar kes taum oe God ting na nuna matatar

¹⁸ A tasmani mang a matatar ning lamur e God ir apuasa i tetek dala, ir itna kol tana mamahatla ning onone dala barati.

¹⁹ A kidol a akakes rop i harnanai pa i mang kol sur a pukakiar ning e God ir apuasa na natnatnala.

8:13: 8:13 Galesia 6:8; Kolosi 3:5 **8:15: 8:15** 2 Timoti 1:7; Mak 14:36 * **8:15: 8:15** “Aba” a puka warwara Aramaic, pa kamkamna mang, “Tata.” **8:16: 8:16** 2 Korin 1:22; Galesia 4:5-7; Tatatai 21:7

20 Anasa a akakesla rop la kes laulau pa la utna oros ka. Bel a nuknuk anuna akakesla, a nuknuk e God ot sur lar harnanai sur a pukakiar,

21 ning e God ir pak sen la kusun a karabus na marase pa minat. Ir alangolango dala na natnatnala kusun a minat, pa akakesla lar kes taum ondala ting na wakak a matatar.

22 Dala tasmani mang tuk onone a kidol a akakes la harnanai taum ana tinangis, arlar ana hane ning i pele ana kankan sur ir agon.

23 Pa bel a akakesla ka, dala otleng, ning e God ka saran tar a ningnigo na artabar tetek dala, a Talngan Tabu, dala otleng dala harnanai taum ana tinangis te na balandala, pa dala mang kol sur a pukakiar ning e God ir apuasa i mang dala na natnatnala, pa ir alangolango a palaondala.

24 E God ka alaun pas dala, pa onone dala harnanai ana tortorot sur a ngas a lalaun ning ir sarani tandala lamur. Ning tik ir harnanai sur ta utna, ning ka kibas pasi, bel ir harnanai ulak suri. Esi ir harnanai sur ta utna ning ka kibas pasi? Bel tik.

25 Ika dala, dala harnanai ana tortorot sur a utna ning belot dala kibasi. Dala harnanai pa bel dala ngoro.

26 Mangotleng larne, a Talngan Tabu ot i sira nangan dala, ning bel al rakrakaindala. Bel dala tasman asaning dalar araring suri, ika a Talngan Tabu ot i sira araring tetek e God sur dala. I araring ana rakrakai a kilkilang ning bel ta warwara ir atalapor lar pasi.

27 Pa e God i oroi a balandala pa i tasman a nuknuk a Talngan Tabu, anasa a Talngan Tabu i araring arlar ana nuknuk e God, sur e God ir nangan anuna tarai.

28 Pa dala tasmani mang a ututnala rop ning i hanot, e God i titol onoi sur a wakakna ir hanot tetek la ning la mang sur e God, pa ka kabah pas la arlar ana nuknukna.

29 Lanigo ot e God ka tasman tar la ning anuna tarai. Pa ka aslang pas la otleng nating ot, sur lar hanot arlar oe Natnalik, sur ai a ningnigo tana galis a tastasnala.

30 Pa la ning e God ka aslang pas la, i kabah pas la. Pa la ning ka kabah pas la i atong la mang la tostos na matana. Pa la ning ka atong la mang la tostos na matana, i amermer la ana nuna matatar.

Bel ta utna ir asauran dala kusun a marmaris ane God

31 I maining, asaning dalar atongi ana ututnala ne? Ning e God i kes taum ondala, esi ir tur na hirua tetek dala? Bel tik.

32 E God bel i maris alar e Natnalik, i saran tari ka sur ir mat sur dala rop. Ning i saran tar e Natnalik sur ir mat sur dala, dala tasmani mang ir saran oros otleng a wakak a utna rop tetek dala.

33 Esi ir tiu dala a tarai na aslang ane God? Bel tik ir tolsot pasi, anasa e God ot ka atong tar dala mang dala tostos na matana.

³⁴ Esi ir atai e God mang ir saran a warkurai a arkeles tetek dala? Bel tik ir tolsot pasi, anasa e Karisito Iesu ka mat sur dala. Bel i ka i ning i toli, e God ka akamtur ulak pasi kusun a minat, pa onone, kanisa ma ot i kes ting na sot a kuna e God, pa i sira araring sur dala.

³⁵ Esining ir asauran dala kusun a marmaris ane Karisito? A mamahatla? A kankanla? O ning dir akadik dala? O a munurak? O bel anundala al kaen? O ta utna na hirua? O ning dir umkol dala ana liwan a harum?

³⁶ Larning di ka tumus tari ting na Buk Tabu, “A pukakiarla rop a tarai la mang sur lar umkol mila,

anasa mila anum na tarai.

Mila arlar ana sipsipla ning di sang sur dir umkol la.”

Buk Song 44:22

³⁷ Bel. Anasa oe Karisito ning i maris kol dala, dala tolsot rop pas a ututnala ne.

³⁸ Anasa a tasmani ot mang bel ta utna ir asauran dala kusun a marmaris ane God. A minat, a lalaun, a angelola, a motla, al ngas a utna ning ir hanot onone pa lamur, pa asaning i rakrakai,

³⁹ pa al ngas a utna misaot pa mite lapiu, bel lar asauran dala kusun a marmaris ane God. Bel ta utna ana kidol a akakes ir asauran sot pas dala kusun a marmaris ane God, ning i saran tari tandala oe Karisito Iesu anundala Leklek.

9

E Pol i balmaris sur anuna tarai

¹ Bel a asongo, a atong ot a momolna ne na matana e Karisito. Pa Talngan Tabu taum ana

balak dia malmaling mang a warwara ne i momol.

² A nuknukik i mamahat kol, pa anuk a balmaris bel i manah.

³ Ning ar tolsot pasi, a mang sur ar tur keles anuk a tarai, a tarai Israel, pa dir suah tar anunla warkurai a arkeles hok, pa dir kepsen iau kusun e Karisito, sur dir alaun pas la.

⁴ La a tarai Israel, ning e God i ras pas la sur la na natnatnala. I asangan tar anuna matatar tanla, i tol tar a kunubusla taum onla, i saran tar a Warkuraila tanla, i asangan tar la ana ngas a lotu momol, pa i lele tar tanla.

⁵ La na mangis a tarai ane Abaram, Aisak pa e Jekop. Pa ning e Karisito i hanot a barsan momol, i hanot onla. E Karisito i warkurai a ututnala rop, pa i ot e God. Dalar atong alekleki, onone pa lamur pa bel ir rarop. Amen.

A titol ane God tetek a tarai Israel

⁶ Ning a atongi larné, bel a atongi mang e God bel i tolsot pas anuna lele tetek a tarai Israel. Anasa bel a tarai Israel rop, la a tarai Israel momol na matana e God.

⁷ Pa bel otleng la rop ning la hanot oe Abaram, la na natnat e Abaram momol. E God i atai e Abaram mange, “La ka miting na mangis a tarai ane Aisak, ning dir atong la mang anum a mangis a tarai.”

Stat 21:12

⁸ Bel la rop ning la hanot oe Abaram, dir atong la mang na natnat e God. La ka ning di agon la ana

lele ane God, la ning e God i atong la mang na natnat e Abaram momol.

⁹ A lele ane God i mange, “Ning a pukakiar ir sot, ar ulak, pa e Sara kar agon pas a kaklik barsan.”

Stat 18:10, 14

¹⁰ Bel i ka i ning, e Rebeka i agon pas a kasang, pa ning a tamandiau ka, e Aisak, a tubundala.

¹¹⁻¹² Ning belot di agon e Esau pa e Jekop, e God i atai e Rebeka mange, “A ningnigo ir titol tetek a murmur.” *Stat 25:23*

A warwara ne i hanot ning naur a kaklik belot dia tol ta wakakna pa ta laulauna. E God i toli larning sur anuna aslang ir arlar ot ana nuknukna. E God i kabah pas esining i mang suri, bel ana ta titol ning ka tol tari.

¹³ Larning e God i atongi ting na Buk Tabu mang, “E Jekop a mang suri, ika e Esau a ngeti.”

Malakai 1:2-3

¹⁴ I maining asa dalar atongi? Mangasa, e God bel i tol a tostos a toltol? Gong dala atongi manglarning!

¹⁵ Anasa e God i atai e Moses mange, “Ar maris tik ning a mang sur ar marisi, pa ar tol a wakakna tana tik ning a mang sur ar tol a wakakna teteki.” *Kisim Bek 33:19*

¹⁶ I maining, ning e God i aslang pas a taraila, bel i kamkamna ana nuknukinla pa ana ta titol ning la toli. Anuna aslang i kamkamna ot ana nuna marmaris.

¹⁷ Larning di ka tumus tari ting na Buk Tabu mang, e God i atongi tetek a king mitumo e Ijip mange, “A suah tar u sur king sur ar asangan a

rakrakaik ning ar tolsot pas u, pa sur a taraila rop te na rakrakan hanua lar tasmani mang iau ka e God.” *Kisim Bek 9:16*

¹⁸ I maining e God i maris a taraila ning i mang sur ir maris la, pa i arakrakai a balan a taraila, ning i mang sur ir arakrakai a balanla sur gong la longor.

¹⁹ Sakana tik ir deken iau mang, “E God ot ning i arakrakai a balan a taraila sur gong la longor, pa i mangasa ning i tiu la? Bel tik ir tolsot sur ir sairas asaning e God i mang sur ir toli ting na nuna lalaun.”

²⁰ Esi u ning u nuki mang ur keles a warwara ane God? U a barsan ka u. Ning tik i tol ta kuro ana piopap, mangmangasa, a kuro ning i to pasi sur ir atongi tetek esaning i toli mang, “Asa kamkamna ning u tol iau larne?”

²¹ Ning a tena toltol kuro i mang sur ir tol ir naur a kuro tagun ning a diah piopap ka, ir mur ot a nuknukna. Ir tol ta wakak a kuro sur a tatatnan ngasala, pa tik otleng sur a pukakiarla oros ka.

²² Mangotleng larning e God i toli tetek a tarai. I mang sur ir asangan anuna balakut pa rakrakaina. Ika kaning ot i harnanai, pa bel i saran kapit a warkurai a arkeles tetek a tarai ning la kes nahai a balakut anunai, la ning ka sang tar la sur lar hirua.

²³ I toli larning sur ir asangan anuna tnan matatar tetek a tarai ning la kes nahai a marmaris anunai. La ning i sang tar la nating ot sur lar kes taum ono ting na nuna matatar.

24 Esi la? Dala ot, ning ka kabah pas dala. Mila ning tagun a tarai Juda, pa mulo ning tagun a tarai masak otleng.

25 I arlar ana warwara ane God ana tarai ning bel a tarai Israel, ning a propet Hosea ka tumus tari mang,

“A tarai ning bel anuki, ar atong la anuk a tarai, pa la ning bel a maris la, ar maris la.” *Hosea 2:23*

26 Pa e Hosea i atongi otleng mange,

“Ting na hanua ning nating e God i atong tari tanla mang,

‘Mulo bel anuk a tarai,’

dir atong la mang ‘na natnat e God, ning i laun.’ ”

Hosea 1:10

27 Ika ona tarai Israel, e Aisaia i warwara rakrakai mange,

“A tarai Israel la galis arlar ana woio tumo latasi, ika a siklik tarai ka ning e God ir alaun pas la.

28 A Leklek ir tol kapit pas anuna warkurai a arkeles rop ting na rakrakan hanua.”

Aisaia 10:22-23

29 Larot ning e Aisaia i atong tari nating mang,

“A Leklek i rakrakai kol, ning bel ir noren al tarai tagun anundala mangis a tarai,

dala kar hirua rop arlar ana tarai miting e

Sodom pa e Gomora.”

Aisaia 1:9

A tarai Israel bel la tortorot

30 I maining asa dalar atongi ana ututnala ne? La ning bel a tarai Israel bel la rakrakai sur lar

tostos na matana e God. Ika e God i atong la mang la tostos anasa ana nunla tortorot.

³¹ A tarai Israel la rakrakai sur lar atostos pas la ana mur warkurai, ika bel la tolsot pasi.

³² Asa kamkamna? Anasa bel la tortorot, la nuki ka mang lar tostos anasa ana nunla na wakak a titol. La buh a hanla ana hat ning la sira buh a hanla ono.

³³ Larotning di ka tumus tari ting na Buk Tabu mang,

“Oroi! Ia ka suah tar a hat saot e Saion, a hat ning, a tarai lar buh a hanla onoi, pa lar punga onoi.

Ika esining ir tortorot onoi, bel ir meme.” *Aisaia 8:14; 28:16*

10

A tarai Israel bel la tasman a ngas ning lar tostos ono

¹ Na tastasikla, a mang kol sur e God ir alaun pas anuk a tarai, a tarai Israel, pa a sira araring otleng larne.

² Anasa a tasmani ot mang, la mang kol sur lar agasgas e God, ika bel la talapor ana toltol ning ir gas onoi.

³ Bel la anatarna pas la nahai e God, sur ir atong la mang la tostos na matana, anasa bel la tasman a ngas ning e God i asangani sur tik ir tostos na matana, pa la tohi ka sur lar asangan la mang la tostos na matana.

⁴ E Karisito i tolsot pas a Warkuraila ane Moses. I maining la ning la tortorot oe Karisito lar tostos na matana e God.

⁵ E Moses i tumtumus onla ning la mur a Warkuraila, mang lar tostos mangmangasa na matana e God. I atongi mange, “Esining ir mur sot pas a Warkuraila ir laun anasa i muri.” *Wok Pris 18:5*

⁶ Pa e Moses i warwara otleng onla ning la tortorot, mang lar tostos mangmangasa na matana e God. I atongi mang, “Gong mulo nuki mang: Esi ir han usaot na langit?” I manglarning mulo mang sur mulor ben pas e Karisito ute.

⁷ Pa gong mulo nuki mang: “Esi ir han purum uting na hanua anuna minatla?” I manglarning mulo mang sur mulor ben kas pas e Karisito kusun a minat.

⁸ A kamkam a warwara ne i mange, “A warwara ane God ka milau. Kaning ot na pahamulo, pa ting na balamulo otleng.” *Lo 30:12-14*

Ine a warwara na tortorot ning mila warawai onoi.

⁹ Ning u apuasa i ana num a warwara mang e Iesu a Leklek, pa u tortorot ting na balam mang e God ka akamtur ulak pasi kusun a minat, e God ir alaun u.

¹⁰ E God i atong u mang u tostos na matana anasa u tortorot ting na balam. Pa ir alaun u anasa u apuasa i ana num a warwara mang e Iesu a Leklek.

¹¹ Larning di ka tumus tari ting na Buk Tabu mang, “Esining ir tortorot onoi, bel ir meme.” *Aisaia 28:16*

¹² I arlar rop ka tetek a tarai Juda pa tetek a tarai masik otleng: Takai ka a Leklek anundala rop. Pa ir angisngis la rop ning la araring teteki sur ir alaun la.

¹³ Larning a Buk Tabu i atongi mange, “La rop ning la araring tetek a Leklek, ir alaun la.” *Joel 2:32*

¹⁴ Ika, ning bel la tortorot ana Leklek, lar araring mangmangasa teteki? Ning bel la longor tar ta warwara onoi, lar tortorot mangmangasa onoi? Ning bel tik i atai la onoi, lar longor mangmangasa?

¹⁵ Ning bel tik i sune na tena warawai, lar han mangmangasa ana warwara talapor? Larning di ka tumus tari ting na Buk Tabu mange, “A tinar ot anunla ning la hanot ana Wakak a Warwara, i wakak kol.” *Aisaia 52:7*

¹⁶ Ika bel a tarai Israel rop la kibas a Wakak a Warwara. Larning a propet Aisaia ka atong tari mang, “Leklek, mila warwara talapor, pa bel tik i tortorot ana numila warwara.” *Aisaia 53:1*

¹⁷ I maining a tortorot i hanot tetek a tarai ning la longor a Wakak a Warwara. A warwara ning la longori, a warwara ot ane Karisito.

¹⁸ Ika, a kabah: Mangmangasa, a tarai Israel belot la longor a Wakak a Warwara? La longori ot. Larning a Buk Tabu i atongi mang,

“A tarai mite lapiu la ka longor a elngenla* .

10:12: 10:12 Aposel 15:9 * **10:18: 10:18** “A elngenla” i warwara ana Kamis, a nangnangla pa kalang. I arlar onoi ning la warwara talapor ona matatar pa tnan titol ane God tetek a tarai te na rakrakan hanua.

A warwara ning ka han sarara ana pukna rop
ting na rakrakan hanua.” *Buk Song 19:4*

19 A kabah kale: I mangasa, a tarai Israel bel la
talapor ana warwara ane God? La talapor ot.
Anasa nating ot e Moses i warwara ana warwara
ane God mang,

“Iau ot ar asanan tar mulo, a tarai Israel, sur
mulor ram sur a keskes anuna tarai ning
bel la miting na tnan matanitu.

Par asanan tar mulo otleng sur a balamulo ir
kut,
anasa ar nangan a tarai miting a matanitu
ning bel la tastasman.” *Lo 32:21*

20 Pa e Aisaia otleng i warwara taum ana
rakrakai mang,

“A tarai ning bel la tatatai sur iau,
la ka pastek pas iau.

A asangan iau tetek la
ning bel la deke sur iau.” *Aisaia 65:1*

21 Ika, ana tarai Israel, e Aisaia i atong a
warwara ane God, mang,

“A pukakiarla rop a arkabah na marmaris
tetek a tarai ning bel la longor, la na tabun
longor.” *Aisaia 65:2*

11

E God i alaun pas dingla ka miting na tarai Israel

¹ I maining a kabah: Mangasa, e God i gilam
ris kusun anuna tarai? Bel! I nuk pas la ot. Iau
otleng a te Israel ot, a tubuna e Abaram, tagun a
mangis a tarai Benjamin.

² E God bel i gilam ris kusun anuna tarai ning nating ot ka tasman tar la. Mangasa, bel mulo tasman asaning a Buk Tabu i atongi oe Elaija? I ururai tetek e God ana tarai Israel ana toltol laulau ning la toli. I atongi mang,

³ “Leklek, la ka umkol tar anum a propetla, pa la ka regen tar otleng na logo na tun artabar tetek u, pa iau kama kane, pa la tohoi sur lar umkol iau.”

1 King 19:10, 14

⁴ Asa a arkeles ane God tetek e Elaija? I kelesi mang, “Anuk a mais a rip a tarai kaning ot, ning bel la lotu tetek e Bal, a asasongo na god.” *1 King 19:18*

⁵ Mangotleng larning onone, e God ka aslang pas siklik a tarai Israel, anasa ana nuna marmaris tetek la.

⁶ E God ka aslang pas la ana nuna marmaris, bel ana titol ning la toli. Ning e God ir aslang pas la anasa ana titol ning la toli, bel a marmaris i ning.

⁷ Dalar oroi, a tarai Israel la tatatai sur ta ngas ning lar tostos onoi na matana e God, ika bel la pastetek pasi. La ka ning ka aslang pas la, la pastek pasi, ika a tarai masik bel. I arakrakai alar ka a balanla.

⁸ Larning di ka tumus tari ting na Buk Tabu mange,

“E God i aloklokron a nuknukinla,
i san akut a matanla sur gong la tai,
pa i akutkut a talnganla sur gong la longor,
tuk onone.”

Lo 29:4

⁹ Pa e Dewit otleng i atai e God mange,

“Ning la kes taum ana nunla na logo na hangan,

ur lingiri sur ir arlar ana kun, ning lar sogor
 pa lar hirua ono,
 pa ir arlar ana uben, ning ir tong akes la,
 pa ir arlar ana hat ning lar buh a hanla onoi
 pa lar punga,
 pa ir arlar ana warkurai a arkeles otleng.

¹⁰ Ur san akut a matanla
 sur gong la tai,

pa ur noren la,

sur a intaurunla ir bul tikin ana tnan
 mamahat.”

Buk Song 69:22-23

E God ka alaun a tarai ning bel a tarai Israel

¹¹ I maining a kabah: Mangasa, ning a tarai Israel la punga, la punga tikin? Bel! Ika, e God i alaun pas a tarai masik, anasa ana toltol laulau anun a tarai Israel, sur ir dat atur a nuknuk a tarai Israel, sur la otleng lar ram sur e God ir alaun la.

¹² Ning a tarai Israel la gilam ris kusun a ngas ning e God ir alaun la onoi, e God i atong angisngis a tarai rop te na rakrakan hanua. Ning i kepsen anuna angisngis kusun a tarai Israel, i saran tari tetek a tarai masik. Ika ning a tarai Israel lar ulak tetek e God, a tarai te na rakrakan hanua lar angis kol.

¹³ Onone a warwara tetek mulo a tarai ning bel a tarai Israel. Mulo tasmani mang a sira titol na aposel tetek mulo, a tarai ning bel a tarai Israel. I maining, a aitna pas a titol ning e God i sune iau onoi.

¹⁴ Ana nuk a titol ne, a mang sur ar akamtur a nuknuk ana nuk a tarai, sur lar ram omulo pa e God ir alaun pas hal onla.

¹⁵ E God i gilam ris kaba kusun a tarai Israel, sur ir armoro a tarai masik. Pa ning e God ir ben ulak pas a tarai Israel, ir wakak kol. Ir arlar ana minatla ning lar laun.

¹⁶ Ar warwara larlar otleng mänge: Ning a ningnigo na diah bret dir sarani tetek e God*, a kidol a bret ane God. Pa ning a wakir a rakai dir sarani tetek e God, a rakrakana otleng ane God.†

A warwara larlar ana naur a rakai a oliw

¹⁷ A tarai Israel la arlar ana rakai a oliw momol ning di ka oman tari, pa mulo a tarai masik mulo arlar ana rakai a oliw rokoi. E God i kuben sen dingla na rakrakana rakai a oliw momol, pa i kibas pas dingla na rakrakana oliw rokoi, pa i apatap la ting na rakai a oliw momol. Pa onone, mulo laun ana polo ning i han miting na wakir a rakai a oliw momol.

¹⁸ Gong mulo iaunan mulo ning mulo oroi a rakrakana ning di ka kuben tar la. Mulo tasmani mang a wakir a rakai ot i saran a lalaun tana rakrakana, bel a rakrakanala la saran a lalaun tana wakirna. I arlar omulo, e God i saran a lalaun tetek mulo kamna ana tarai Israel.

¹⁹ Sakana mulor atongi mang, “E God i kuben dingla na rakrakana sur ir apatap tar mila ting na pukna ning ka kuben tar la.”

* **11:16: 11:16** A toltol anuna tarai Israel, a ningnigo na diah bret di sarani tetek e God. † **11:16: 11:16** Naur a warwara larlar ne i warwara ana tarai Israel mang la ane God. **11:17: 11:17** Epeses 2:11-19

²⁰ A momolna ot, e God i kuben la anasa bel la tortorot. Pa mulo, e God i apatap tar mulo anasa mulo tortorot. Pa gong mulo aitna pas mulo, mulor matmataut.

²¹ Anasa e God bel i maris alar la, i kuben tar dingla na rakrakana rakai ning. Ning i toli larning onla, ir toli otleng larning omulo ning bel mulo tortorot.

²² I maining mulor oroi a marmaris pa balakut ane God. I asangan anuna balakut tetek la ning la han masik kusuni, pa i asangan anuna marmaris tetek mulo, ning mulo tortorot ana nuna marmaris tetek mulo, pa bel mulo manah kusuni. Ika, ning bel mulor tortorot, ir umsem omulo otleng.

²³ Pa tarai Israel, ning lar tortorot, la otleng, e God ir apatap ulak la, anasa i tolsot pasi.

²⁴ E God i umsem pas mulo miting na rakai a oliw rokoi, pa i apatap tar mulo ting na rakai a oliw momol. Manglarning, bel i ngangaten sur ir apatap ulak na rakrakana rakai a oliw momol ting na rakaina.

E God i mang sur ir asangan anuna marmaris tetek a taraila rop

²⁵ Na tastasikla, a mang sur mulor tastasim ana utna ning nating i mumun, sur gong mulo aitna pas mulo. I manglarne: Dingla na tarai Israel, ir rakrakai a balanla, tuk ning a wawas ana tarai masik ning la tortorot, ir arlar ana nuknuk e God.

²⁶ I maining ir alaun rop pas a tarai Israel.
Larning di ka tumus tari ting na Buk Tabu
mange,

“A Tena Alaun ir han misaot e Saion‡,
pa ir lingir a mangis a tarai ane Jekop§ sur bel
ma lar gilam ris kusun e God.

²⁷ Pa ine a kunubus ning ar toli taum onla,
ar kepsen anunla na toltol laulaula.” *Aisaia*
59:20-21; 27:9

²⁸ A tarai Israel la na hirua ane God anasa bel
la tortorot ana Wakak a Warwara, sur ir angis
mulo a tarai masik. Ika, e God i maris kol la,
anasa i aslang pas na tumtubunla.

²⁹ E God bel i sira lingir a nuknukna kusun a
tarai ning ka kabah pas la, pa bel i sira kibas
ulak anuna artabarla kusun la.

³⁰ Nating, bel mulo sira longor tetek e God. Ika
ning a tarai Israel bel la longor teteki, e God i
maris mulo male.

³¹ I mangotleng larning, onone a tarai Israel
bel la longor tetek e God, sur lar kibas anuna
marmaris, anasa i maris mulo.

³² E God i noren tar a tarai rop sur anunla
tabun longor ir dot akes la, sur ir asangan anuna
marmaris tetek la rop.

Dalar atong leklek pas e God

³³ Lakla! I itna kol
a wakak a nuknuk e God pa anuna tastasim.
Bel tik ir tolsot sur ir papak ana nuknuk e God.
Bel tik i tasman anuna ngasla.

‡ **11:26: 11:26** E Jerusalem di sira atongi otleng e Saion.

§ **11:26: 11:26** E Jekop ning a risana otleng e Israel. **11:27:**
11:27 Jeremaia 31:33-34 **11:33: 11:33** Aisaia 55:8-9

34 “Esi i tasman tar a nuknuk a Leklek?
Pa esi ka warwara na arnangai tar teteki?”

Aisaia 40:13

35 “Esi ka tabar tar e God anal utna
sur ir kelesi teteki?”

Jop 41:11

36 Anasa i ot i akes a ututnala rop,
pa i ot a kama ututnala rop,
pa anunai ot a ututnala rop.

Dalar atong leklek pasi, onone pa lamur pa bel ir
rarop. Amen.

12

Dalar saran tar anundala lalaun tetek e God

¹ I maining, na tastasikla, a nunung mulo sur mulor saran tar a palaomulo rop tetek e God, anasa e God i maris kol mulo. Mulor saran tari arlar ana artabar ning i laun, i totoh, pa e God i gas ono. I ning anumulo a lotu momol tetek e God.

² Pa gong ma mulo oroi asaer ana lalaun mite na rakrakan hanua. Mulor saran tar mulo tetek e God sur ir lingir a nuknukimulo, pa ir atona i, sur mulor tasman lalan a ngas a toltol ning e God i mang suri. A toltolla ning i wakak, i tostos kol, pa e God i gas onoi.

³ Anasa ana nuna marmaris tetek iau, a atongi tetek mulo rop taktakai mang: Gong mulo aitna kol pas mulo ot. Mulor warkurai wakak a toltol anumulo, arlar ot ana tortorot ning e God ka saran tari tamulo.

11:34: **11:34** 1 Korin 2:16 **11:36:** **11:36** 1 Korin 8:6 **12:1:**
12:1 Rom 6:11, 13; 1 Pita 2:5 **12:3:** **12:3** 1 Korin 12:11; Epeses
4:7

⁴ Dala taktakai, takai ka palaondala, ika a galis a didiah palaondala pa anunla titol otleng bel i arlar.

⁵ Mangotleng larning dala, dala galis, ika oe Karisito dala takai ka. Dala taktakai, dala na halalnala.

⁶ Ana marmaris ane God, i saran tar a maskana artabar tetek dala taktakai. Ning tik, e God i saran tar a artabar na warwara na propet teteki, i wakak ning ir titol wakak onoi, arlar ana nuna tortorot.

⁷ Ning tik, e God i saran tar a artabar na arnangai teteki, i wakak ning ir nangan wakak a tarai onoi. Ning tik, e God i saran tar a artabar na asaer teteki, i wakak ning ir asaer wakak a tarai.

⁸ Ning tik, e God i saran tar a artabar teteki sur ir wunan a tarai, i wakak sur ir toli larning. Ning tik, e God i saran tar a artabar a titol na artabar teteki, i wakak ning ir palas a kuna tetek a tarai. Ning tik, e God i saran tar a artabar a titol na ningnigo teteki, i wakak sur ir titol rakrakai sur ir nigon wakak a taraila. Ning tik, e God i saran tar a artabar a titol na marmaris teteki, i wakak ning ir maris a tarai ana gasgas.

A wakak a toltol ning dalar muri

⁹ Ir wakak ning anumulo a marmaris tetek a tarai ir momol. Mulor nget a laulauna, pa mulor tong akes a wakakna.

¹⁰ Mulor mang artalai sur mulo larning mulo mang sur na tastasimulo. Mulor hanrawai artalai mulo, pa gong mulo nuk pas mulo ot.

¹¹ Mulor titol rakrakai, pa gong mulo ngoro. Mulor titol tetek a Leklek ana tnan gasgas ting na balamulo.

¹² Mulor harnanai taum ana gasgas sur a ututnala ning e God ir tabar mulo onoi lamur. Ning mulo pastek a mamahatla, mulor tur rakrakai, pa gong mulo manah ana niaring.

¹³ Ning a tarai ane God la kapan sur ta utna, mulor nangan la. Mulor gas pas na wasira ting na numulo na rumai.

¹⁴ Ning a tarai la alaulau mulo, mulor araring sur e God ir atong angis la, pa gong mulo araring sur e God ir alaulau la.

¹⁵ Ning a tarai la gas, mulor gas taum onla. Pa ning la balmaris, mulor balmaris taum onla.

¹⁶ Mulor tur taum ana wakak a toltol artalai tetek mulo. Gong mulo aitna pas mulo. Mulor gas sur mulor kes taum ana tarai ning bel di aitna pas la. Pa gong mulo nuki mang mulo tastasman kol.

¹⁷ Gong mulo keles a laulauna ana laulauna. Mulor nuknuk wakak sur mulor tol a toltol ning a tarai lar oroi lalani mang i tostos.

¹⁸ Ning mulo tolsot, mulor rakrakai sur mulor kes na balmolmol taum ana taraila rop.

¹⁹ Na halalik, gong mulo keles tik ning i tol a

12:10: **12:10** 1 Pita 1:22 **12:12:** **12:12** 1 Tesalonika 5:16-18

12:13: **12:13** Hibru 13:2 **12:14:** **12:14** Matiu 5:44; 1 Korin 4:12

12:16: **12:16** Gutpela Sindaun 3:7 **12:17:** **12:17** 1 Tesalonika

5:15 **12:19:** **12:19** Matiu 5:39

lauauna tetek mulo. Mulor noren tari ka tetek e God sur ir asangan anuna balakut pa ir kelesi. Anasa di ka tumus tari ting na Buk Tabu mange, “A Leklek i atongi mang, ‘Iau ot ar saran a warkurai a arkeles teteki, pa iau ot ar kelesi.’ ”

Lo 32:35

²⁰ Ika mulor toli mange,

“Ning anum a hirua ir murak ur tabari,
pa ning ir mos ur agangi.

Ning u toli larning teteki, ir meme ana nuna
toltol laulau.” *Gutpela Sindaun 25:21-22*

²¹ Gong u noren ta laulauna sur ir tolsot pas u.
Ur tolsot pas a laulauna ana wakakna.

13

E God ot i suah tar a matanitu

¹ Dala rop dalar anatarna pas dala nahai a ningnigola miting na matanitu. Anasa e God ot i saran tar a keskes na ningnigo tetek a ningnigola miting na matanitu, pa bel ta matanitu ning e God bel i tol otnan tari.

² I maining tik ning bel ir longor ana warkurai anuna matanitu, bel i longor ana warkurai ning e God ot ka suah tari. Pa la ning bel la longor tetek a matanitu, la ot lar dat pas a warkurai onla.

³ Ning tik i tol a wakakna bel ir matmataut sur a tena warkurai miting na matanitu, ika ning ir tol a laulauna ir matmataut ot. Pa ning u mang sur ur langolango kusun a matmataut, ur tol a wakakna pa matanitu ir atong leklek pas u.

⁴ Anasa e God ot i suah tar a ningnigo miting na matanitu sur a tena titol anunai, sur ir tol a wakakna tetek u. Ika, ning ur tol a laulauna, ur matmataut, anasa bel i tong oros ka a liwan a harum. A ningnigo miting na matanitu ai a tena titol ane God, sur ir saran a warkurai a arkeles tetek tik ning i tol a laulauna.

⁵ I maining, i wakak ning dalar anatarna pas dala nahai a ningnigola miting na matanitu. Bel i kamkamna ka anasa a matanitu ir saran a warkurai a arkeles tetek dala, i kamkamna otleng mang a wakak a nuknukindala i atai dala mang dalar toli larning.

⁶ I maining mulor sira saran otleng a totokom tetek a matanitu, anasa a ningnigola miting na matanitu, la na tena titol ane God, pa la sira saran a lalaun anunla ana titol ne.

⁷ Mulor saran asaning i tostos sur mulor sarani tetek a tarai rop. Mulor saran a ngas a totokom rop tetek la ning la los totokom. Pa mulor saran a hanrawai tetek a ningnigola, pa mulor aitna pas la ning i tostos sur mulor aitna pas la.

Esining a tena marmaris ka tolsot pas a Warkuraila

⁸ Gong u noren tar anum ta dinau tana tik. Ika anum ning a dinau ka ning bel ur manah na kelesi i mange: Ur mang sur a tarai. Pa bel male ta dinau. Esining i mang sur a tarai, ka tolsot pas a Warkuraila ane God.

⁹ Pa ine a Warkuraila ane God: “Gong u tol a toltol laulau ana ta hane anuna tik o ta barsan

anuna tik. Gong u umkol tik. Gong u kinkinau. Gong u ram sur a utna anuna tik.” A warkuraila ne pa warkuraila rop otleng, takai ka a warkurai i aslang la. I mange,
 “Ur mang sur a halim larning u mang sur u ot.”

Wok Pris 19:18

¹⁰ Esining i mang sur a halna bel ir tol ta laulauna teteki. I maining, esining i tol a toltol na marmaris, i tolsot pas a Warkuraila.

¹¹ Mulor toli larning, pa mulor oroi lalan a pukakiarla onone. A pukakiar ka hanot sur mulor mata. Anasa ning dala turpas a tortorot oe Karisito, a pukakiar ning e God ir alaun dala, belot i milau kol, ika onone ka milau.

¹² Ka morom pas, pa milau ir kabakiar. I maining dalar suah sen a toltol miting na mormorom, pa dalar mermer taum ana ututnala na harum miting na talapor.

¹³ Dalar mur a tostos a toltol, larning dala laun ana kabakiar. Gong dala sipak, pa gong dala kukuk taltal taum ana longlong a toltol. Gong dala tol a pamuk a toltol, pa gong dala tol a utna na meme. Gong dala arngaras, pa gong dala bal laulau.

¹⁴ Ika mulor mermer taum ana lalaun anuna Leklek e Iesu Karisito, pa gong mulo nuknuk sur ta ngas ning mulor agasgas a turai a lalaun.

14

Gong dala artituu ana ututnala ning bel i itna na

13:10: **13:10** 1 Korin 13:4-7 **13:11:** **13:11** Epeses 5:14; 1 Tesalonika 5:6-7 **13:12:** **13:12** 1 Jon 2:8 **13:13:** **13:13** Luk 21:34; Epeses 5:18 **13:14:** **13:14** Epeses 5:11

matana e God

¹ Gong mulo oroi laulau tik ning bel i tur rakrakai ana tortorot, mulor gas pasi. Pa gong mulo arngaras ana ututnala ning bel i talapor onoi.

² Dingla na tarai la tortorot mang i wakak ka sur lar ien a ututnala rop. Pa dingla na tarai ning bel la tur rakrakai ana tortorot, bel la mang sur lar ien a inagoila. La ien ka a utna ning di omani.

³ Esining i sira ien a ututnala rop, gong i oroi purpukum esaning bel i ien a utna rop. Pa esining bel i ien a ututnala rop, gong i nuki mang esaning i ien a ututnala rop i tol a toltol laulau, anasa e God ka gas pasi.

⁴ Gong u warkurai a tena titol anuna tik masak. Anuna Leklek ot ir oroi mang ir tur rakrakai o ir punga. Ika ir tur rakrakai ot, anasa a Leklek ot ir tolsot pasi sur ir arakrakai i.

⁵ Mangotleng larne, dingla na tarai la nuki mang ning a pukakiar ka i itna tan dingla na pukakiar. Pa dingla na tarai otleng la nuki mang a pukakiarla lar arlar rop ka. I wakak ning dala rop taktakai dalar tol asaning i tostos ting na nuknukna.

⁶ Esining i nuki mang ning a pukakiar ka i itna, a nuknukna i larne, sur ir aleklek pas a Leklek ono. Pa esaning i ien a ututnala rop, i hangan larne, sur ir aleklek pas a Leklek ono, anasa ka atong wakak pas tetek e God onoi. Pa esi otleng ning i ien ka a ututnala ning di omani,

i hangan otleng, sur ir aleklek pas a Leklek ono, pa i atong wakak tetek e God onoi.

⁷ Ning dala laun, bel anundala ot a lalaun, pa ning dala mat, bel otleng a lalaun anundala.

⁸ Ning dala laun, dala laun sur a Leklek. Pa ning dala mat, dala mat sur a Leklek. I maining, ning dala laun o ning dala mat, dala anuna Leklek ot.

⁹ E Karisito i mat pa i laun ulak, sur ir Leklek anunla ning la ka mat, pa anunla otleng ning la laun.

¹⁰ Gong u tiu e tasimlik. Gong u oroi purpulum e tasimlik. Anasa dala rop dalar tur salanigo ana keskes na warkurai ane God.

¹¹ Larning di ka tumus tari ting na Buk Tabu mang,

“A Leklek i atongi mang, ‘I momol a laun, pa i momol a warwara otleng anuki lerne: A tarai rop lar kes ana bokona hanla salanigo tak,

pa tarai rop lar atong puasai mang iau e God.’ ”

Aisaia 45:23

¹² I maining, lamur dala rop taktakai dalar warwara talapor tetek e God ana ututnala rop ning dala ka tol tari.

Gong dala tol ta utna ning ir alaulau a tortorot anuna tik

¹³ I maining gong ma dala artituu artalai dala. Mulor nuknuk wakak sur gong mulo tol tar ta toltol ning ta tasimulo ir punga onoi.

¹⁴ Ana nuk a lalaun ona Leklek e Iesu, a

tasman momoli mang bel ta utna na hangan ir asanan tar dalar sur dalar laulau na matana e God. Ika, ning tik i nuki mang bel i tostos sur ir ien ta ngas a utna, i momol bel i tostos teteki sur ir ieni.

¹⁵ Ning u ien ta utna ning i aloklokron a nuknukna e tasimlik, bel u apuasa a toltol na marmaris. Gong u ien ta utna na hangan ning ir alaulau a tortorot anuna tik, ning e Karisito i mat suri.

¹⁶ Ning u nuki mang ta utna i wakak, gong u tol ta toltol ning ir asanan tar tik sur ir atong laulau a utna ning.

¹⁷ Anasa a matanitu ane God bel tagun a hangan pa gang. A matanitu ane God tagun a tostos a toltol, a balmolmol pa gasgas ana Talngan Tabu.

¹⁸ Pa ning tik ir mur a toltolla ne ana nuna titol tetek e Karisito, e God ir gas onoi, pa tarai otleng lar oroi lalani mang a toltol anunai i tostos.

¹⁹ I maining dalar rakrakai kol sur dalar tol otnan a balmolmol, pa dalar arakrakai a tortorot anundala artalai.

²⁰ Gong mulo alaulau a titol ane God, anasa ana utna na hangan. A utna na hangan rop i wakak na matana e God, ika bel i tostos ning tik ir ien ta utna ning ir asanan tik sur anuna tortorot ir punga.

²¹ I wakak sur gong u ien ta inagoi, pa gong u gang a wain, pa gong u tol ta ngas a utna otleng larning, sakana asaning ur toli ir asanan e

tasimlik sur ir punga.

²² A ututnala rop ning u nuki mang i wakak tetek u, anumui ot ma e God. Esining i tol ta utna pa nuknukna bel i tiwi onoi, i angis.

²³ Ika esining i hangan, pa i urmatana nuknuk onoi, e God ir warkurai i, anasa bel i mur anuna tortorot. Pa ututnala rop ning tik i toli, ning bel i mur anuna tortorot, i ning a toltol laulau.

15

Dalar nangan la ning bel la tur rakrakai ana tortorot

¹ Dala ning dala tur rakrakai, i wakak ning dalar nangan la ning bel la tur rakrakai ana tortorot. Pa gong dala nuk pas dala ka.

² Dala rop taktakai dalar nuk pas otleng na halalindala, pa dalar tol a ututnala ning ir nangan la sur ir arakrakai anunla tortorot.

³ Anasa e Karisito otleng, bel i nuk pas i ot, larning di ka tumus tari ting na Buk Tabu mange, “God, a laulau a warwara ning di atongi hom, i akadik iau otleng.” *Buk Song 69:9*

⁴ Anasa a warwarala rop ning di ka tumus tari nating ting na Buk Tabu, di tumus tari sur ir asaer dala, sur dalar tur rakrakai ana nundala tortorot, pa ir wunan dala otleng sur dalar harnanai ana tortorot sur a utna ning e God ir toli lamur.

⁵ A araring mang e God ot, ning i sira arakrakai anundala tortorot, pa i sira wunan

dala, ir dat taum mulo sur ir takai ka a nuknukimulo, ning mulo mur e Karisito Iesu.

⁶ A araring larning, sur ir takai ka a balamulo pa elngemulo sur mulo taum mulor atong lekkek pas e God, a Taman anundala Lekkek e Iesu Karisito.

E Karisito i hanot otleng sur a taraila ning bel a tarai Israel

⁷ I maining mulor gas artalai pas mulo, larning e Karisito i gas pas mulo, sur mulor atong lekkek e God.

⁸ A atongi tamulo mange, e Karisito i hanot arlar ana tena titol anuna tarai Juda, sur ir asangani mang a warwara ane God i momol. Ning i toli larning, i tolsot pas a lelela ane God ning ka tol tari tetek na tumtubunla.

⁹ I hanot otleng sur a tarai ning bel a tarai Israel lar atong lekkek pas e God ana nuna marmaris. Larning di ka tumus tari ting na Buk Tabu mange,

“I maining ar atong lekkek pas u
na arpotor a tarai ning bel a tarai Israel,
par saksak na atong lekkek tetek u.” *2 Samuel*
22:50

¹⁰ Pa di ka tumus tari otleng mange,
“Mulo a tarai ning bel a tarai Israel,
mulor gasgas taum ana tarai ane God.” *Lo*
32:43

¹¹ Pa di ka tumus tari otleng mange,
“Mulo a tarai rop ning bel a tarai Israel,
mulor atong lekkek pas a Lekkek,

mulo a kaba taraila rop mulor saksak na atong
leklek pasi.” *Buk Song 117:1*

¹² E Aisaia otleng i warwara na propet oe
Karisito mange,

“Takai ir hanot miting na mangis a tarai ane
Jesi* arlar ana sibul ning i gomo miting na
wakir a rakai.
Ir king pa ir nigon a tarai miting na
matanitula,
pa tarai ning bel a tarai Juda lar tortorot onoi,
pa lar harnanai ana tortorot sur a wakakna
ning ir toli.” *Aisaia 11:10*

¹³ Pa araring tetek e God, esaning dala
harnanai suri ana tortorot sur a wakakna ning ir
toli. A araring sur ir abukus mulo ana tnan
gagas pa balmolmol, ning mulo tortorot onoi.
Pa ana rakrakai ana Talngan Tabu ot, mulor
harnanai ana tnan tortorot sur a wakakna ning
e God ir toli lamur.

E Pol i warwara ana nuna titol

¹⁴ Na tastasikla, a tasmani ot mang mulo
bukus ana wakak a toltol pa tastasim, pa mulo
tolsot pasi sur mulor asaer artalai mulo.

¹⁵ Ika, te na pas ne a warwara kol ana dingla
na ututna, sur mulor nuknuk ulak onoi. A
tuntumus tetek mulo, anasa ana nuna
marmaris, e God i aslang pas iau,

¹⁶ sur ar tena titol ane Karisito Iesu tetek a
tarai ning bel na tarai Juda. A arlar ana tena
artabar tetek e God, ning a warawai ana Wakak
a Warwara ane God, sur a tarai ning bel na tarai

15:12: 15:12 Tatatai 5:5 * **15:12: 15:12** E Jesi, e tamana e king
Dewit. **15:15: 15:15** Rom 1:5; 11:13

Juda la anuk a artabar tetek e God ning ir gas onoi. Pa Talngan Tabu ka atotoh tar la.

¹⁷ I maining, oe Karisito Iesu, a gas kol ana nuk a titol tetek e God.

¹⁸ Bel a mang sur ar warwara ana ta utna masik. A mang sur ar warwara ka ana titol ning e Karisito ka tol tari ana kuk, ning a ben a taraila ning bel a tarai Juda sur lar longor tetek e God. La longor teteki anasa ana ututnala ning a atongi pa a toli na arpotor tanla.

¹⁹ La oroi a rakrakai ana akinalangla pa ututnala na kulkulan ning a toli ana rakrakai ana Talngan Tabu. Manglarning misaot e Jerusalem tuk to e Ilirikum ia ka warawai rop pas tingia ana Wakak a Warwara ane Karisito.

²⁰ Ana kamkama nuk a titol tetek e Karisito tuk onone, anuk a tnan nuknuk sur ar warawai ana Wakak a Warwara ting na hananuala ning bel la tasman e Karisito, sur gong a tol a rumai saot na kamkam a rumai ning tik ka atur tari.

²¹ Ika a mang sur ar toli larning di ka tumus tari ting na Buk Tabu mange,

“La ning belot di atai la onoi, lar oroi, pa la ning belot la longori, lar tasmani.” *Aisaia 52:15*

²² A tohi sur ar han tetek mulo, ika a molot ana titol na warawai ting na hananuala. Ine a kamkamna ning belot a han tetek mulo.

E Pol i mang sur ir han utumo e Rom

²³ Ika, onone anuk a titol ka rop te na paparla ne. Ka galis a rau ana nuk a tnan nuknuk sur ar oroi mulo.

²⁴ Pa ning ar han utumo e Spen, a nuki mang ar kes siklik pas napirimulo pa dalar gas taum pas. Lamur ar kamtur ulak sur ar han utumo e Spen. Pa a mang sur mulor nangan iau ana nuk a tinan utumo.

²⁵ Ika onone, ar han kaba usaot e Jerusalem sur ar nangan a tarai ane God tisaot.

²⁶ Na tena tortorot to na naur a papar Masedonia pa e Akaia la gas sur lar migen taum a mani, sur lar nangan a tarai ane God ning la kapan saot e Jerusalem.

²⁷ Momol, la nuki mang i wakak ning lar toli larning. Pa i tostos otleng ning lar keles tar na tarai Juda, anasa na tarai Juda la ka nangan tar la, sur la otleng lar kibas a utna na ingun ning e God i angis la ono, ning nating ana tarai Juda ka. Pa i wakak sur la male lar angis na tarai Juda ana mani.

²⁸ Pa ning ia ka arop tar anuk a titol pa ia ka saran tar a artabar ne tetek a tarai ane God saot e Jerusalem, ar han utumo e Spen. Ana nuk a tinan utumo, ar geren nigon tar mulo.

²⁹ Pa a tasmani mang ning ar hanot tetek mulo, ar bukus ana angangis ning e Karisito ka saran tari tak, sur ir nangan mulo.

³⁰ Na tastasikla, ana risan a Leklek e Iesu Karisito pa ana marmaris anuna Talngan Tabu,

15:25: 15:25 1 Korin 16:1-4 **15:26: 15:26** 1 Korin 16:1; 2 Korin 8:1; 9:2, 12; Aposel 24:17 **15:27: 15:27** 1 Korin 9:11
15:29: 15:29 Rom 1:11 **15:30: 15:30** 2 Korin 1:11; Kolosi 4:3; 2 Tesalonika 3:1

a nunung mulo sur mulor tur taum hok ana mamahatla, ning mulo araring tetek e God sur iau.

³¹ Mulor nunung e God sur ir alaun iau kusun a tarai ning bel la tortorot, ning saot na papar Judia. Pa mulor araring otleng sur a tarai ane God saot e Jerusalem lar gas ana artabar ning ar abarani tanla.

³² Ning a nuknukna e God, ar hanot tetek mulo ana gasgas, par manah taum omulo sur ar kibas ulak pas a rakrakai.

³³ E God, esaning a kama balmolmol, ir kes taum omulo rop. Amen.

16

E Pol i saran a marmaris tetek a tena lotula tumo e Rom

¹ A atai mulo ana tasindala e Pibi. A hane ne, a wakak a tena titol miting na tarai a lotu tumo e Senkria.

² A mang sur mulor gas pasi ana risana Leklek, arlar ana tarai ane God la sira toli. Pa mulor nangani ana ta utna ning ir kapan suri, anasa ka nangan wakak tar a galis a tarai pa iau otleng.

³ Mulor saran anuk a marmaris tetek e Prisila pa anuna barsan e Akuila, ning mitol titol taum ana titol ane Karisito Iesu.

⁴ Dia alaun pas iau ning a tarai la mang sur lar umkol iau, pa bel dia nuk pas anundiau a lalaun. A atong wakak kol tetek diau, pa bel iau ka, a tarai a lotu rop ning bel na tarai Judia, la otleng la atong wakak tetek diau.

⁵ Mulor saran anuk a marmaris otleng tetek a tarai a lotu ning la sira lotu taum ting na nundiau a rumai.

Mulor saran anuk a marmaris tetek a halik e Epenetus, ai a ningnigo na barsan mitumo na papar Esia ning i lingir a nuknukna pa i tortorot oe Karisito.

⁶ Mulor saran anuk a marmaris tetek e Maria, esaning ka titol rakrakai pas tetek mulo.

⁷ Mulor saran anuk a marmaris otleng tetek e Andronikus pa e Junias, naur a maik ning dia kes taum pas hok ting na karabus. Na arpotor ana aposella a risandiau i rarang. Dia naur a te Karisito nigo tak.

⁸ Mulor saran anuk a marmaris tetek e Ampliatus, ning a mang kol suri ana risan a Leklek.

⁹ Mulor saran anuk a marmaris tetek e Urbanus, ning a tena titol taum hok ana titol ane Karisito, pa mulor saran anuk a marmaris tetek e Stakis, ning a mang kol suri.

¹⁰ Mulor saran anuk a marmaris tetek e Apelis, esaning di tohoi pa i apuasa i mang ai a tena tortorot momol oe Karisito.

Pa mulor saran anuk a marmaris tetek la ning miting na rumai ane Aristobulus.

¹¹ Mulor saran anuk a marmaris tetek e Herodion, a maik, a te Israel. Pa mulor saran anuk a marmaris tetek la miting na rumai ane Narsisus ning la anuna Leklek.

¹² Mulor saran anuk a marmaris tetek e Tripina pa e Triposa. Naur a hane ne dia titol rakrakai ana titol anuna Leklek. Pa mulor saran anuk a marmaris tetek ning a halik otleng e

Pesis, a hane ning i titol rakrakai kol ana titol anuna Leklek.

¹³ Mulor saran anuk a marmaris tetek e Rupus, ning a Leklek i aslang pasi. Pa mulor saran anuk a marmaris tetek e tana otleng, ning i nangan iau arlar ot oe nang.

¹⁴ Mulor saran anuk a marmaris tetek e Asinkritus, Plegon, Hermes, Patrobas, Hermas pa tastasindala otleng ana tortorot ning la kes taum onla.

¹⁵ Mulor saran anuk a marmaris tetek e Pilologus pa e Julia, Nereus pa e tasna hane, pa e Olimpas, pa taraila rop ane God ning la kes taum onla.

¹⁶ Ning mulo arsongo mulor maris artalai mulo ana argoro na marmaris, pa mulor toli ana totoh na toltol. A tarai a lotu ane Karisito miting na hananuala rop la saran anunla marmaris tetek mulo.

A ararop a warwara na arnangai

¹⁷ Na tastasikla, a nunung mulo sur mulor atumarang mulo kusun a tarai ning la sira pagal asauran a tarai a lotu, pa la atong a warwarala ning i sairas a asaerla ning mulo ka kibas pasi. Mulor han masik kusun la.

¹⁸ A ngas a tarai ning, bel la mur anundala Leklek e Karisito. La mur ot a nuknuk na palaonla. La warwara ana namnamin na warwara pa warwara na agasgas, sur lar asobor a tarai ning bel la tastasman wakak.

16:13: 16:13 Mak 15:21 **16:16: 16:16** 1 Korin 16:20; 1 Pita 5:14

16:17: 16:17 Matiu 7:15; Taitus 3:10 **16:18: 16:18** Pilipai 3:19;
2 Pita 2:3

¹⁹ A taraila rop la talapor ana numulo a longor tetek a Leklek, i maining a gas kol omulo. Ika, a mang sur mulor tastasman wakak ana asaning i wakak, pa gong mulo alasan mulo ana asaning i laulau.

²⁰ Pa e God, esaning a kama balmolmol, milau ma ir pas gingini e Satan nahai a hamulo.

A marmaris anuna nundala Leklek e Iesu ir kes taum omulo.

Na halalna e Pol la saran anunla marmaris tetek a tarai Rom

²¹ E Timoti, esaning mia titol taum ana titol ane Karisito, i saran anuna marmaris tetek mulo. Pa natol a maik otleng, e Lusius, Jeson pa e Sosipater, natol a te Israel, ditol saran tar anunditol a marmaris tetek mulo.

²² Iau otleng, e Tertius, ning a tumus a warwarala ane Pol te na pas ne, a saran anuk a marmaris tetek mulo ana risana Leklek.

²³⁻²⁴ E Gaius i saran anuna marmaris tetek mulo. A barsan ne i gas pas iau, taum ana tarai a lotu rop, pa i sapang anuna rumai tetek mila. Pa e Erastus a tena tai alar ana mani mite na hanua ne, pa e Kuatus a tasindala, dia otleng dia saran anundiau a marmaris.*

Dalar atong aleklek e God

16:19: **16:19** Rom 1:8; 1 Korin 14:20 **16:20:** **16:20** Stat 3:15

16:21: **16:21** Aposel 16:1-2; 19:22; 20:4 **16:23-24:** **16:23-24**

Aposel 19:9; 1 Korin 1:14 * **16:23-24:** **16:23-24** Dingla na tena tastasmai ana Buk Tabu la nuki mang dingla na warwarala otleng i kes te na ves ne. I mange: *A marmaris anuna Leklek e Iesu Karisito ir kes taum omulo rop. Amen.*

²⁵ Dalar atong aleklek pas e God! I tolsot sur ir tong rakrakai mulo ana tortorot, arlar ana nuna warwara ana Wakak a Warwara ning a sira warawai onoi, a Wakak a Warwara oe Iesu Karisito. A Wakak a Warwara i mumun tagun nating ot.

²⁶ Ika onone, ka hanot talapor. Mila warwara talapor ana saning a propetla la atong tari oe Karisito. Mila toli arlar larning e God, ning i laun tikin, i atai tar mila sur milar toli, sur a taraila miting na matanitu rop, lar tortorot pa lar muri.

²⁷ Dalar atong leklek pas e God, takai ka a God, esaning a tena tastamai. Dalar atong leklek pasi anasa oe Iesu Karisito, onone pa lamur pa bel ir rarop. Amen.

A Wakak a Warwara ane God
The New Testament in the Label language of Papua
New Guinea

Nupela Testamen long tokples Label long Niugini

copyright © 2023 Wycliffe Bible Translators Australia

Language: Label

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-02-02

PDF generated using Haiola and XeLaTeX on 11 Mar 2026 from source files dated 2 Feb 2026

13fa0832-6e31-5347-b6eb-57b79224ca94